


元許文忠公至正集

柳田文庫

文庫11

D 93

3



至正集卷第十四

五律三

3

文庫 11
D 93
3

278

3

010190548878

元湯陰許文忠公有壬著

律詩

待泮

愁裏時時醉春來日日陰無謀能解凍有句且娛心陶去憐儲粟
疏歸詔賜金還家均一樂餘事任浮沉

聞泮喜成

思鄉思附翼彌日苦相稽忽報冰為水仍傳路有泥篙師挈畫鷁
河伯挿金雞去去休回首歸途更不迷

買舟小甚戲成四韻

紫閣三年夢清江一葉舟遂心甘踟躕容膝儘優游犬卧須蟠足
鷓鴣尚打頭伊誰乘萬斛自有濟川謀

訪郭子敬祭酒於稻田山居醉中作詩贈之



攬轡澄清徧登瀛笑傲還意長殊不醉身健更當閑茂樹疑無屋
崇臺盡得山下鄰吾有願疎懶政相闕

再用前韻二首

世路辭登涉鄉居事往還莫為千日醉渾得幾朝閑溜雪明懸筋
香雲亂博山詩愁誰喚起春鳥正闌闌

雲癡猶出岫鳥倦恰知還我夢已驚覺此身惟受閑白留窗外雪
青愛水中山俗客從今少柴門莫返闕

憶可行

秋征曾有約十月便歸來南國鴈已盡東風花又開酒缸連月備
詩檐幾時回手種洹溪柳青青滿釣臺

臺翁旌高年耆德妻亦同壽

壽域開無際禔身得最多子孫三釜養翁媪八旬過桑梓駢華表

門庭蔭綠波風人重偕老吾為爾成歌

汪叔志堪老園

有地皆堪老惟鄉老最堪生涯都不校祖德幸無慚楚景收全勝
村醕取半酣吾衰今夕夢應與子俱南

耆陽周吉甫師張君采為僮所殺吉甫擒僮殺之師讎遂復
子暉為應奉求賦

世有逢蒙後仍聞不義侯羹倫因盡戮滄海遂橫流白刃吾能踏
青天志竟酬悠悠千載下方識報師讎

淳熙御書次其韻

翰長閣府公請賦

宴安懷鴆毒板蕩任鯨吞南土饒風景中原失本根無人扶帝胄
有句及漁村一旦天戈至潮聲遶海門

雲州劉氏貞節

貞節不為石龍門氣與高一
天孤倚託三子立劬勞爰典期無斁
桓楫愧有褒詠歌誰復靳傳爾在吾曹

東安竇敬祖妻梁氏貞節

夫人胡不幸無子且無夫舅也弗能履叔兮方待哺一心如白水
萬事在黃墟孝節關風教聲詩播海隅

用王繼學韻題近仁御史雪林小影

松與雪相宜松風更細吹始知天放樂多在歲寒時
逃世衣冠古看雲杖履遲無緣遂終隱我豈多出京師

送知事王安中赴樞密掾

辯幕忍咸腓人從奈我違苦辛容藥蓼急緩節弦韋欲見詩書效
能教簿領稀鴻樞有公論一鶚看橫飛

圭塘獨坐二首

我屋來西圃輪蹄二里遙晚風收菡萏秋雨長芭蕉有酒容開口
無官免折腰柴門莫堅閉恐負野人招
地僻心逾靜詩多意轉長陰森穿竹迳甘脆剝蓮房魚長已堪釣
醅香先自嘗敢言誇畫錦聊復此圭塘

漫書

誰謂予多蹇年來儘遂心作池通活水栽竹值連陰景物源源出
門墉步步深從知非大隱有此小山林

有舟

有舟維老樹欲動恐傷蓮遂使成虛器何由濟大川錦雲香捧擁
煙月澹留連汎汎行無礙霜清八月天

新秋即事

莫踏蒼苔破茨門畫亦關林風秋入樹波日晚搖山原野蒼茫外

煙霏指顧間更教安一榻月夜不須還

秋陰

秋陰宜沼上蘚翠不曾乾聽雨朝款枕觀雲暮倚闌地寬人自在
松茂竹平安天遂閑中樂豐年酒不難

次可行即事韻

秣田秋半熟香入小磁缸霜水清浮簞煙嵐翠可窗酒添詩癖重
茶戰睡魔降笑問登山屐吾生費幾雙

登越臺排律

問俗來南海休期上越臺際天迷莽蒼拔地出崔嵬五管衣冠府
連城錦繡堆勢吞蒲澗遠氣壓海珠摧嶺嶠橫卷石滄溟瞰一杯
人驚塵世隘鳥盡碧天回霧列蕃中國雲摩船上梳黑風鯨浪立
紅日蜃樓開市貨煩重譯蠻琛盡九垓緬思魑結子徒困島夷財

下瀨纔分節雕費又劫灰秋郊猿狖泣春草鷓鴣來形勝渾如昔
興亡不暇哀我行求古迹天遣度詩才誰慰襟懷惡多慚繡斧陪
薄寒收毒厲微雨淨浮埃藹醬宜柳肉頻婆薦麝醅簿書聊棄置
風景屬徘徊長笑魚龍駭逆歸鼓角催壯遊心未已東北是蓬萊
奉定乙丑閏正月七日同伯庸少監捧御祝香祠天寶宮以
苔色連修竹為韻分賦得苔字

秩祀神宮閔鳴騶甲觀來爐熏分黼宸佩玉響蓬萊八景中天降
流雲午夜開蕭聲清入骨燭泪冷成堆感格風生暮昭融月滿臺
松擎元鶴舞霞擁綵鸞迴介福應駢集新詩得細裁陽坡青動柳
陰壁紫凝苔天運當昭代官寮愧譚材願持今日志庶用答涓埃
史顯甫治書父慶八十壽用曹子貞尚書韻

舊植生芝樹新開種玉田庭闈盡鳥藻簪紱出蟬聯俯仰身無愧

開承世有賢明時推盛典綵服照芳筵烏府秋如水青雲地近天
郡封三品貴鄉飲一堂專夢笑非熊異心依顧兔圓車因探春坐
袍為賀正擗鋒重金攢荔茵香錦泛蓮人間得如此何處更求仙

送魯子輩赴西臺御史

弱冠名先振高風士久歆文章追古作韶獲發遺音大器成非晚
盈科耻已深旁通嗤黑守約說謝書淫下榻驚詞匠擔簦藹子衿
銀橫翰學海玉樹照儒林鼓舞非吹萬登崇匪枉尋溟鴻搏直上
儀鳳瑞當今小展鑿坡步還司憲府箴支傾堅柱石藥病富苓參
元惡腥區宇厖恩息斧砧倡言陳慷慨進疏竭忠忱遐裔隨編置
義倫免陸沈五車勤始効眾口噤如瘖昔也勞推轂茲焉遂盍簪
主文推半席敝帚致千金行水知無事登車豈有心皂雕騰肅肅
聽馬去駸駸此日瞻卿月他年作相霖歲寒情勿替分路念同陰

次伯庸上都寄來韻

文章君瑞世交友我忘年典璽當機要求人得俊賢一封新獻議
三黜舊繩愆甲觀通金闕山房冷石田嘉徵應鱣集高躅看鶯遷
只有傷心處歌聞相府蓮

遼州高士賈師敬以延祐三年六月捐館明年四月過其墓
以詩哭之

山林多隱逸夫子獨超倫養志官旌孝居鄉俗化醇雪螢嚴進學
冰蘖懍持身明月過頭枝清風折角巾愛閑誠有樂守道更誰親
詩酒窮元亮煙霞痼子真甫云待清誨遽爾掩黃塵命駕期千里
傷心未六旬山英悲蕙帳朝議緩蒲輪有子家何慮無官志亦伸
百身甯贖死三縣遂無人書葉芸香冷墳垣樹影新音容猶彷彿
蹤迹已沈淪不用招魂些書名繼逸民

游蔣山次李峯韻

道途雖僕僕得暇即登山有樂來金地何心夢玉闕雪餘梅噴白
霜重樹留殷缺畝無遺秉郊原有敗管泉香龍已去松老鶴初還
好作菟裘計分雲住半間

和王務先見寄韻

理世足英豪同書貴俊髦士生知孔孟時至或夔咎髮敢千鈞繫
絲憐獨繭綠官瘵費料理技養負爬搔白首曾何補黃扉豈不遭
風雲京國遠煙雨楚山高厭事惟中酒忘憂謝擬騷本同多病馬
偶似賦歸陶君子幸無責故人仍見褒魚牋來傑句獸錦炫仙袍
笑我徒重趂多君拔一毛江湖幾年夢文史半生勞道域應深造
朋簪愧素叨相期宜努力學海看波濤

遊青山途中值雨

四郊將告早一雨正投機敢恨妨窮勝方忻免阻飢鷗邊初細細
馬首漸霏霏露浥塵皆淨衣沾迹尚微加鞭投草市假館憩柴扉
急吹鳴嘯過重陰笑騎闌白煙映空走銀箭滿山飛繁響傳巖谷
清寒襲布韋如麻從達曙有酒自忘歸收斂功何遠遨遊願不違
地平波綠漲枝重果紅肥歲事了禾黍時芳及蕨薇敷腴均品物
明潤動晴暉志喜漸椽筆踈狂謾一揮

贈萬國卿郎中並序

廣平萬嘉閩國卿皇慶壬子為山北憲照磨燕山庸齋劉
公實憲長長山韓從義為幕長國卿幼尚未冠庸齋忠厚
長者有人倫鑑謂當超軼遠到而不才亦辱薦焉治具棋
局或休期登眺必三人俱而不才與焉承乏御史南臺國
卿適為臺照磨握手歡甚而庸齋從義九原不可作矣對

酒話舊未嘗不為之流涕也俄國卿拜御史西臺僉雲南
憲改江西河南陞副使入厯臺院部出為浙省正郎於是
庸齋之言始驗至順辛未秋投紱居潤絕江來揚州致先
太夫人賻壬申八月二十七日余北歸過之感念歲月相
顧錯愕蓋國卿山北時年甫三十五余二十六今國卿髮
無一黑而余亦蒼蒼矣出諸公詩文曰子我舊過諸公可
無為我紀之余惟二十年朋舊凋謝觸目傷心存而幸會
合者有幾况舊且密莫吾二人若則此會可不謂難乎可
不有以紀之乎其紀之之詞曰

昔在徒陽日俱當少壯年夙心欣所遇晚歲守何堅幸辱明公厚
仍逢幕府賢笑歌無芥蒂出入每蟬聯暎縱沙堤轡寒同土屋羶
宋園閑即到韓墅醉曾眠借馬僮偕樂分羔肉每偏看山宜計路

沽酒不論錢謬荷推三益多慚共一廬夜談常達曙公會更移筵
俄索長安米尋乘建業舡蟹欣再合鴻鴈遠相捐秦樹和天遠
滇雲捲雨旋軹車輕國步烽火靜河壘善搏非攘臂豐扛貴息肩
扣門驚倒屣分路忍先鞭世事應難料人生自有緣一心如白水
萬丈已華顛夜鶴應無怨春鶯任屢遷虛名何物耳好作地行仙
至正改元四月十二日戊子 皇帝御龍舟幸護聖寺中書
右丞臣帖穆爾達寶參知政事臣阿魯臣有壬扈行樂三奏
命右丞前特授平章政事參政進右丞臣有壬進左丞懇辭
不允惶汗就列平章右丞曰今日遊騁之盛恩遇之隆不可
不紀也悚懼之餘為二十韻以獻

宇宙承平日邦畿壯麗鄉宮中無暇逸湖上暫翱翔鳳輦重雲降
龍舟萬斛驤風霆隨桂楫日月運牙樯五衛分翬羽千官列鴈行

長年花壓帽仙妓錦連航絨緯初徐引鑿旌漸遠揚葦蕪呈曼衍
傑休遮鏗鏘玉食傳麟脯冰壺出蔗漿魚鳶知永蹕鶯燕逐餘香
夾岸金戈翊彌空繡幕張汀迴開翰海天近勝錢塘翠閣峩霜島
珠簾護兩廂九霄披瑞靄四表覩朝陽補助資遊豫登崇貴俊良
不圖推朽質亦復被清光左轄網維地中書政事堂出謀慚不學
好樂願無荒喻水民堪畏從橋策最長濟川非所任歌詠獻巖廊

途中除夕贈胡謙牧

今夕知何夕征途適歲除素餐驚曠日清議敢甯居已驗軒容鶴
真成鼎柱車靜言思往者只有賦歸與山好來天際塵空值雪餘
幾程投逆旅一笑愧茆廬村酒磁甌淺柴烟土銼虛承恩無報效
出畫莫躊躇良友煩連轡高談實起余詩成拈秃筆真是中書

桂林翁挽詩並序

廬陵永豐百三歲人曰桂林翁劉淑正者九十三歲時豫
章熊先生朋來記其堂百歲時近而鄉郡遠而四方至於
京師紀其德歌其壽者知幾百首孫鵠楚奇哀為家慶集
奉定甲子二月翁卒同郡劉奉常岳申銘其墓附集後楚
奇請發其未盡而其紀之詳歌之盛無不盡者已獨念翁
之生也紀若詠詳且盛若是其卒也獨留一銘爾其沒而
不能忘者豈容無辭以寓其鄉人無窮之思乎嘉楚奇之
學作挽詩十六韻以補其闕云

百歲古云少翁年又過三杖鳩奚用杭天爵復何儋足正儒門立
功深理窟探浮雲常過眼積雪久盈簪月午琴三弄花春酒半酣
雞山翰遠淡鷺水挹清甘佳趣人誰識虛名我豈堪化鄉非獨善
種德見多男景迫仍安健仙遊等笑談死生皆有得俯仰更無慚

子姪分垂白孫曾盡出藍詩章留疊疊堂構濼潭潭繼世誰能象
遺編保不蟬生存形善頌飄忽散晴嵐鄉社如咸秩先生實可參
懷賢嗟不及飛夢大江南

次韻可行坐嘉蓮亭有感

懶是平生癖歸田始克勤灌園時汲井學稼曉耕雲窗取山千疊
舟巡沼四瀆倦遊當稅駕勇退免移文誰識予心樂都忘俗務殷
圭塘清見底銀海浩無垠潦倒惟營口迂疎愧致君天開方外境
塵見隙中曛酒欲連宵飲膏須繼晷焚讀書嗟坐廢娛老却宜醺
園綺知高祖巢由負放勳至人先大節餘事即多聞詩少慚工部
鞋多笑領軍郊原諷歲計風靈逼秋分且曳泥中尾休空冀北羣
崇臺還一上萬物正芸芸

送馬明初教授南歸詩并序

後至元戊寅予得請歸江夏別業明年冬遊長沙明年二
月安仁馬君明初來見於琅璆山其人溫醇其文粹精頌
蓋如平生同遊南岳更倡造和遂同歸江夏甫七日復叅
知政事命下以小兒累之又同北焉至任城明初舟覆幾
不免間闕跋涉不忍予棄用中臺翰林薦堂除緱山書院
山長及格擢右衛率府教授始釋褐衛官若胥卒皆國人
明初請收書教其子弟為華學官屬從之鳩俸檄明初買
書江南因得歸省其家焉過予相下將別請言吁世俗之
交翻覆雲雨况延之館塾者其為友不又密乎饕餮之不
精不時也供侍之不慎不及也脯脩之不腆也汲引之不
酬也為主人者有能不犯於是者乎人情久則狎狎則慢
慢則隙生焉賓主至是而不失歡者鮮矣而明初與予十

年如一日始終無間言有德君子哉述其概為詩以餞之
其詩曰

吾子昔傾蓋琅璆古渡頭袖文驚蜀錦懷寶重天球心既同金斷
膠因向漆投有邀須共往無倡不為酬南岳朝連轡湘江暮艤舟
履窮峰頂寺詩滿水邊樓訪古由來喜尋芳到處留遂移衡浦隱
便作武昌遊坐席何曾暖招旌遽見求高情安旅次遐躅又神州
道路多嘗險山川只薦愁掃雲髻免穎塵雪散貂裘善誘兒何幸
深藏價未收忽看鴻鵠舉甘效蜃蛭休洹水寒偏瑩林慮晚更幽
誰知三任已相累十春秋公道先揚善真才自拔尤恩袍明翡翠
教鐸振貔貅行役仍清淡言歸貌阻修臨歧惟一語音信莫悠悠

水木清華亭宴集十四韻并序

水木清華亭御史王公公儼別墅也位都城巽隅出文明

門餘里許園池構築甲諸邸第予客京有年識公儼亦久
而未嘗迹其地至正乙未春自汴召入俄公儼由遼省拜
中臺握手傾倒屢約宴集塵冗不果至期宿具復有意外
之撓乃七月二十又三日始遂盍簪左轄呂仲實中執法
杜德常右司王本中左司尚彥文實同尊俎酒旨樂備物
腆意勤適雨霽秋清塵空地迴庭木湧翠渚蓮散紅北瞻
闔閣五雲杳靄極目西望舳艫汎汎於煙波浩渺雲樹參
差之間蕭然有江鄉之趣不知其為轂擊肩摩之境也煩
襟滯慮滌濯淨盡茲遊奇絕宜造物之不輕畀也公儼請
曰人生四美百年幾遇不可不紀也乃即水木清華亭為
韻賦詩有壬分華字其詩曰

世祿推門闕天墀幾拜嘉高情忘勢利大隱謝紛譁朝市塵無染

蓬瀛路豈賒眷言營別墅初不遠東華畫舸堂前過青帘柳外斜
晴空迷菡萏寒翠接蒹葭揮塵風生座扶筇雨壓沙萍開輕泛鴨
荷側重擊蛙只訝神仙府誰知宰相家賓朋元圃玉文采赤城霞
麗曲凝雲表鮮粧炫水涯添栽三徑竹遞賞四時花心事尊中物
人生海上槎相逢須盡興明日各趨衙

至正集卷第十四終

至正集卷第十五

律詩七言

送黃文復歸長沙

半生湖海夢依稀但送湘南遠寄詩先友凋殘公獨健故園荒盡
我方歸百年未滿常憂畏千里相逢又別離他日瓊江松下路西
州難似此沾衣

次阿榮存初宣慰韻

芬華刊落著才名曾見橫飛白玉城雙節自歸修月手九天誰聽
夏雲聲軒扉風露清無夢杖屨林泉澹有情莫道東山絲竹好顛
崖回首奈蒼生

歐陽初心思亭

節婦能收戰骨回肯堂仍得甯馨兒九原難作身未殉一息尚存

心不哀今古有知風樹恨乾坤無盡夢我詩更將致慤明來齋亭
畔豐碑待客辭

南樓 以下五首和王繼學奏政韻

江流天遠亂晴霞郭影雲深帶晚鴉長笛透空清似水健帆飛浪
碧成花石城瓊壁神仙府畫棟朱簾帝子家詩在好山濃翠處莫
教煙霧等閑遮

武當宮

絳節搖山引翠幢誰開琳宇對清江雲霄路近在丹竈松檜影寒
空碧窗方外洞天今有幾人問國士自無雙蓬萊弱水知何處且
繼昌黎賦下瀧

雪後登南樓

徙倚危闌俯釣舡空明金碧訝鈞天寒收江影澄拖練晴動山光

濕帶煙萬里青雲孤鶴去一竿滄海六鰲連惟應聽罷南飛鴈
信人間有醉眠

沙武口望武昌

煙樹蒼蒼不見城水禽驚起背人鳴舟搖疊嶂高還下鴉閃殘陽
滅又明關塞夢寒愁遠道江山詩瘦苦情多好將身外無窮事都
付滄浪欸乃中

途中

風物過淮都入畫松筠當雪亦成叢乾坤已見來儀鳳霖雨多應
待卧龍江路梅花千樹發海天山色四時濃圖南本自鷗鵬事不
是人間不見容

橫山有高竹樓別業留信宿始歸

酒香牲膾主人歸正是猿驚鶴怨時梅影小池春入畫竹聲虛閣

夜催詩世間真樂無多事身外浮名只費辭他日結茆容我隱一章先當買山資

望土門山

遠峯天外碧嵯峨滿貯鴟夷信馬過堤柳雨餘黃著色野塘冰盡綠生波十年俗駕迷途遠一片春山勝事多却笑采詩仍習氣何如牛背夕陽歌

登嶽祠正陽樓用同年李伯強留題韻

青山高處結層樓九點微茫認禹州煙浪遠浮舟隱隱天風清咽角悠悠仲宣多感空能賦元亮平生不解愁莫望長安西向笑蒼顏難繼少年遊

次竹樓韻

勝地佳人邂逅逢一林行盡翠朦朧松聲帶雪清欲滴山色到樓

寒更濃眩目更誇龍虎榜論文曾歎馬牛風對床醉卧誰呼起却是煙村曉寺鐘

送曾學遜游浙

平生遊浙勞夢想羨子一年行兩迴越地春因修禊去錢塘秋及看潮來江山清境聊乘興今古盛時無棄才便好騎鯨窮汗漫海天東向有蓬萊

和同年李芳齋縣尹韻

牛刀何足展君長妙割雖多不用鉗彭澤秫隨楊柳種河陽花帶桂枝香當時文會人千里幾度月明天一方回首茫茫又南北暮雲深處望琴堂

題孫幹卿父榕寓公芝圖

嵩山遠采竟無徵坐上天文見一莖風紀政刑真有感乾坤嘉瑞

豈徒生紫雲墮地收不起玉樹凌空長又成此去百祥仍作頌高門橋梓自同聲

和繼學見寄韻

憶昔乘風在帝傍珠璣紛落五雲鄉藍田夙擅連城價粉署曾分滿袖香歸去山林惟魯酒興來天地有奚囊江湖何日重攜手見說鱸魚味最長

送術士陳九山歸九華

常記乘輶過九華撲人濃翠濕晴霞十年空作山中夢半世猶隨海上槎紫閣彤闈君盡友清泉白石我無家談元便約同歸隱聽罷松風自煮茶

安僧宣慰異竹

移竹曾交竹不知附鞭蠲腹已端倪化工談笑出七子人力栽培

無幾時地墳只疑龍獻角實成應有鳳來棲何須辯怪如歐老留作甘棠慰去思

九日次趙東彞韻

平山雲樹錦爛斑人倚霜空十二闌公館簿書常負節海天風雨漸成寒人間有地容三徑身外何心戀一官應被黃花嗤我輩幾時同去釣江干

風雨中憲司觀荷僉事鄭裕卿索詩

小金山下水雲多一片秋聲萬柄荷霞臉雨香勻膩粉翠裙風急捲輕羅從知柏府開仙署肯放蘭舟發棹歌珍重此時清絕景主人無酒奈詩何

盧仲禮知崇德州未月而頌聲作題其卷末

報政曾聞五月程君侯旬日便蜚聲良心感觸無愚哲荒歲施為

繫死生才器每於難處見詩書真到用時明從今早備如椽筆擬待三年頌有成

送書吏戴奎遷兩湖奎以學稱刻木像母事之

塵俗紛騰雁鷺行就中金羽自依昂詩人尚得官長惜孝子忍教途路忙像貌固知非土梗精誠隨寓是美塋崇卑有分君休校姓字誰沾翰墨香

題趙季文茶屋

山人有屋不容花自笑平生只愛茶鄒子墅邊鴻漸宅洛陽城裏玉川家清風夢斷膏粱氣小鼻雲翻粟粒芽不用反關嫌俗客五侯亭館自芬華

挽曹士弘

煙草佳城二十秋士林能說舊風流諸郎盡得書中祿此老應無

地下憂逝水才華今古恨浮雲富貴死生羞碑銘傳滿人間世遠勝征西紀墓頭

送相士周竹泉歸金陵

可山當日刺過從神日秋涵水鏡空老子醉歌曾有贈阿戎多藝又相逢江湖歲晚難為客天地詩豪不救窮好在蔣陵松下路幾時容我一枝筇

揚州李氏貞節

歌吹繁華市井連就中冰玉自清堅身將同穴生猶死月不如人缺又圓宅裏聲光重華表古今風教有青編子孫堂下森蘭玉天擁春和在暮年

輓曹士由

孝友先生不愛官詠歌歸去老儒冠誨人昔亦非佔儻矜式今猶

未蓋棺百世聲名毛穎重九原風雨鶴鴒寒虎山回首松楸路常
使行人說二難

上都寄高辛甫參議

同陰頃刻尚留連六遂同寅豈偶然世路往來皆傳舍人生離合
有機緣雲山煙水幾千里霜木星辰二十年不日中秋定歸去紫
垣明月共嬋娟

棗林閑待水

河上梳竿密似林河中流水貴如金雲泥咫尺隔千里道路尋常
勞寸心風挾清寒猶作陣柳搖黃影未成陰人生偏側自為爾江
海白鷗何處尋

送劉廷正歸臨江

士行多岐首孝廉誰能千里事齋鹽良才橫棄天應惜游子貧歸
母不嫌夜雨江湖詩更苦春風薇蕨夢方甜眼中盡是經行處誰
信而今白髮添

壽李秋谷平章

黃鐘噓暖晚春留綠蟻浮香帶月萬宰相得間纔是貴人生有子
更何求家傳文字五千卷身在神仙十二樓記取年年好風景雪
松霜檜豈容秋

王文煥三喪未舉以詩道其意庶有遇焉

秋風闕塞底跋踈聽罷行藏亦愴神父祖三喪俱淺土詩書四世
只清貧由來慕義推燕趙忍復無情效越秦送子空言深自愧世
間應有麥舟人

次王克繼憲副韻

莫道棄軺老不任公餘猶及事幽尋樹陰壓屋日亭午花片撲人

春向深吾道升沈真有命野雲舒卷本無心粗豪已作狂司馬長日官曹擁鼻吟

主試遼省次提舉馬蒼山韻

六年陳迹重經過曾鄙揚雄賦駁姿簪紱敢陪英俊後江湖恐負水雲多當時塗抹已堪笑今日冬烘其奈何賴是西風知客意一宵吹夢到魚簑

題張德潤孝行詩卷

張奉親極遵陸家人舟行值寇而無恐也

南遊具慶盡怡愉一旦歸來與影俱孝子惟知親不死瘴江先念事多虞終天有恨何嗟及古栢無情亦為枯萬里祖塋安厝了幾人漂泊愧黃墟

送朱本初住玉隆萬壽宮

春風煙水片帆飛去去難緇鶴氅衣仙秩受來真是貴世途行徧

正宜歸眼空雲海天無際心折京塵夢漸稀日拜旌揚憑致懇若孫方困簿書圍

次石中丞敗荷韻

蓋敝衣空莫主張從知柔脆敢凌霜蝕殘老葉餘枯柄放出清波泳太陽光綴落螢秋冷淡夢寒栖鷺月微茫但教七澤根株在一脉能傳不盡香

和石中丞韻二首

詩似天葩散異香學如瑤海引流長小巫平日誇神氣河伯而今見大方閱世壯心堅鐵石拂雲高節飽風霜休將山色論歸興回首安車恐轉忙

西風吹夢野萼香一舸歸來路轉長正賴韋絃調緩急敢離規矩妄員方月明杜若天如水秋入蒹葭露已霜好趁黃花侍尊俎明

朝南海馬蹄忙

送翟志道歸毗陵

埋頭簿領惜蹉跎昨夜西風動棹歌
豹管才呈一斑爾鴻鐘其奈寸莛何
雲封石室玄無恙秋染蒼江翠不波
回首毗陵相憶處山川寥落月明多

九日登石頭城詩并序

金陵山水甲江南凡昔號盛絕著郡乘者往往可徵以息以游隨其所適而悉獲所欲若夫考古昔之廢興盡江山之形勢咫尺千里盼睐四極發奇胸雪滯慮非憑高眺遠如東山之於魯太山之於天下則未易得其概鍾阜雨花非不高也而蔽虧隱見或得或遺求形勢之備得清涼寺翠微亭蓋古石頭城也至治壬戌九日中執法石公侍書

郭公具酒肴登馬監察御史劉傳之李正德羅君實八孔子文廉公瑞阿魯灰夢吉照磨萬國卿暨有壬實佐行時宿雨初霽萬象澄澈長江鈎帶風檣出沒淮，江南諸山歷歷可數與夫川原之逶迤樓閣之雄麗雖一草一木不能逃也金陵之美斯為盡得起坐周覽清興橫生執法公曰吾儕生承平位清要宴地盛事簡歲時休暇得與諸公連轡以嬉豈偶然哉人生聚散雲萍飄忽昔者所與今誰此留而明年此會吾知其未易知也侍書曰此不可以不紀也酒一再行二公督詩不已乃各誦所記九日詩奉古作之傑出者相與大笑傾倒不知深盃之屢空也坐久風勁不可留於是借僧室飯而歸夫欲考廢興之迹於一時有不得而悉者江山形勝固無恙也而石城之盛實甲金

陵當佳節侍名公遊勝地諸美具矣塵世一笑古且為難
是宜有以紀之也顧沮縮於古人可乎精糧將見則糠粃
在前有士忘其陋而序其說且係之以詩曰

一江環抱四山圍酬節追歡剩費詩鴈影不隨雲盡處秋光都在
雨晴時當年玉樹人何在明日黃花蝶豈知便駐高軒拚醉倒絕
勝無酒繞東籬

分行南海初發建康

聖世要荒覆載均年年分節徧咨詢一鞭殘月馬如電萬里清秋
筆有神南海雲霞先入夢西江花草更宜春但將平日清貞操歸
獻吾君效野人

秋浦道中

秋浦風光世亦稀謫仙仙去久無詩天邊九子青未了山上五松

寒欲飛結屋有心真落落乘輶無計可遲遲懷賢對景何嗟及又
見行人指翠微

黃花驛

疎雨瀟瀟釀早寒荒庭寂寂掩柴關秋聲動地滿前竹清風襲人
無數山十日已為千里客百年真得幾朝閑雲泥蹤迹從何意底
用題詩傳舍間

饒州光華樓

輪奐飛空四面窗臨風暫得息紛囋民生盡逐魚鰕利郭影半涵
雪水邦鴈足曳雲添暮景角聲吹月滿寒江鄉闕何處休愁絕湖
海元龍氣未降

曉登古步五通廟閣用察掾董仲達韻

神鬼何須較屈伸倚闌高興薄層雲日開混沌三竿上路入微茫

一線分世故能拋皆樂土人生無用是多聞采詩未了催行役回
首山林愧隱君

濛江驛

灌叢樛木亂鬚髮敗屋踈籬罨畫中沙石漾波清練練山林纏霧
濕濛濛穿胸盡入堯天覆鳩舌能將漢語通問俗無功深自愧采
詩歸去繼王風

贈歐陽逕存次其韻

到處公侯倒屣迎祇緣湖海有先聲長貧正坐詩為崇博學誰教
藝得名物外煙霞窮樂事人間花草任春榮一聲鐵笛飄然去明
月秋江徹底清

監試上都次柳道傳途中韻二首

川原風色晚蕭騷發轍塵沙一日勞明世踈慵竟何補長途筋力

謾相塵天邊白草寒無際馬首青山近漸高只恐稚圭今復有移
文非我更誰嘲

歲寒沙磧瑩無泥客子身心付馬蹏山雪斑斕僵樹立寒天空濶
暮鴻低傷心臺上人千載想像河梁手一攜當日是非何足較躡
雲吾欲挽虹霓

游西山得疾同年焦德元以詩見寄次韻答之

好山佳客正相資仰盡危巔俯折枝泉石豈能真作癖神靈應怪
不留詩可憐隱几低垂處猶夢川雲踴躍時若問維摩得疾否小
窗危坐自能知

岩翠霏微濕冷煙松聲浩蕩撼搖天從知勿藥本无妄畢竟到山
還有緣短壑孤雲猶悵望清風明月且高眠脫如謝傅攜絲竹應
是參苓剩費錢

至正集卷第十五終

至正集卷第十六

律詩

和王繼學寄分省諸公韻二首

粉署涼多酒易消
紫垣天近慣聞韶
甘分桐乳朝承宴
香惹爐烟晚近朝
行殿日華明玉藻
清灤秋影殿冰綃
聖時扈從臣無策
願棄樓舡只就橋

西掖梧桐一院陰
太平官府靜沈沈
敢叨紫綬承黃閣
曾受青燈鍊赤心
漳水風煙千里隔
蓬山宮闕五雲深
小窗退食成佳趣
恰好茶香月轉琴

送胡宗文教諭崇陽

教邑休辭展布難
一方儀範幾人看
但教多士有矜式
大勝達官惟素餐
梓匠不言能辯器
泮池雖小可觀瀾
聖門事業須加力
更

與乖崖締歲寒

宿程松壑月香亭

秋興亭前秋已清
月香亭上月方明
人間臺榭如三島
山頂歌聲徹五更
醉客日中猶未起
歸舟風急不容行
新涼漸到平津閣
誰信長江隔兩城

青山醉中題詩芭蕉葉上海朝宗折歸解恕齋元帥賦詩見

贈次其韻

雲片輕明界綠絲
揮毫真與墨相宜
翠遮湖石八九扇
清受主人多少詩
老圃風霜休蠹毀
騷鄉縑褚自神奇
可憐顰蹙推敲處
渾似羈窗聽雨時

武昌出郭用解之昂御史韻

風急天高霜信傳
江村回首思悠然
雲生遠岫濃還澹
路轉荒陂

斷復連交友得陪天下士
此生當作地行仙
陽春白雪真難和
目斷疎林一抹烟

青山道中呈之昂

抗走塵埃已厚顏
杖藜猶未厭躋攀
畫圖紅葉煙中樹
詩句碧雲天外山
釣艇遠隨波上下
舊遊疑在夢中間
眼前俗慮都排遣
安得浮生盡日間

陽羅懷古用之昂韻

憶昔天戈孰未撞
眼中已見趙孤降
上游先擣腹心地
末路敢云脣齒邦
自是乾坤開盛世
誰言南北限長江
登臨不用多惆悵
詩滿奚囊酒滿缸

登陽羅祠用之昂韻

憑高四顧水連天
隅斷紅塵覺地偏
風月一觴容我輩
舳艫千里

記當年大江東去終歸海炎微南窮未是邊清世身閑亦多幸詩成須和不須傳

舟中無寐呈之昂

攬衣歌枕聽江聲殘夢茫茫續不成一棹舳舫三日醉幾星漁火四山明游心鴻鵠天邊去得句魚龍水底驚三老長年都絕倒南州吾客久無卿

詠酒露次解怒齋韻

世以水火鼎鍊酒取露氣烈而清秋空沆漑不過也雖取酒亦可為其法出西域由尚方達貴家今汗漫天下矣譯曰阿刺吉云

水氣潛升火氣豪一溝圍繞走銀濤璇穹不惜流真液塵世皆知變濁醪上貢內傳西域法獨醒誰念楚人騷小爐涓滴能均醉做

殺春風白玉槽

詠酒蘭膏次怒齋韻

世以酥入茶為蘭膏怒齋取鷄子黃入酥治酒形色甚相類而味則迥絕又謂之酒蘭膏云

空房醜婦尚須求七椀何如醺一甌混沌黃中雲乳亂鷓鴣斑底蠟香浮不教焦氏稱歡伯誰信盧家有莫愁從此武夷溪上月好移光彩照青州

之昂以七月望賞月有詩已而中秋果無月遂和其韻

許大明光何處收當時清景若為留世間節序空膠柱老子襟懷在玉舟向使不為終夕醉真成虛負一年秋更憐病客書窗下風雨蕭蕭藥滿甌

賴謙齋安撫以詩招飲次韻答之

平生燕越徧遨遊不似晴川利得秋
便把漢江都釀酒要教塵世總無愁
當年謬挽千鈞筆此去惟須一釣舟
三徑寒香應未減鴈霜蛋月肯回頭

飲淡香亭次恕齋韻

四面松筠一徑苔兩池如壁繞崇臺
沙鷗狎客不肯去野鶴橫江時復來
身老山林惟有屐興深江海欲無杯
蘭亭至樂有觴詠底用新粧燦落梅

欲招樂府予止之故云

淡香亭散復飲月香亭因宿焉

一日天教四美并淡香亭罷月香亭
風高漢水翻秋碧雲近淮山送晚青
有酒便從元亮飲無琴何用子期聽
今宵大別多情月不似當時照獨醒

同之昂宿郎官湖太白祠飄然樓主人黎東軒年七十三吹

洞簫間以觴詠至四鼓始寐時九月十五日也

半醉飄然樓上時眼中如見謫仙詩
洞簫聲挾霜飛早鎖闥光迷月轉遲
清話一宵無芥蒂美人千載共襟期
郎湖留得黃花在一任蜂愁蝶不知

飲謙齋秀野園

松菊芙蓉左右通有亭都在水雲中
遙峯入座輕顰翠落葉迎人慢舞紅
印壑一區真有分弓刀千騎竟何功
我詩便為君圖取却笑王維是畫工

題瀘州先氏書巖

王顛孟蹶蜀何堪何似先家復此巖
千古異端終反正一鄉多士見司南
懷歸有夢驚華髮濟美無求漫綠衫
更為諸孫中祖訓莫教喬木擅雲龕

次韻高堯臣太監二首

堪輿俯仰一為人，水有波濤陸有塵。但使寸心如日月，儘教多事似參辰。平生行業非充隱，到處溪山可卜隣。花柳前川寓言耳，胸中自是一壺春。

風月無邊物外人，可能人海抗巖塵。青雲華貫慚書考，白髮遺經益競辰。道德幾年思尚友，煙霞何日得為隣。試看老圃荒寒處，須信黃花正是春。

分臺憶洹溪陪胡安常侍御晚坐因以寄之

洹溪西望暮山稠，山影涵溪翠不流。松柏相望才二里，萍蓬輕別又三秋。霜臺多幸叨聯署，野服何年續舊遊。解紫菊黃應咫尺，請君先為浣鄉愁。

題國子生葉恒父謙甫墓碣後

達材今古出成均，恒也方期學日新。甘廢晨昏思養志，忍居天地遽忘親。丈夫聞道死無憾，生子作儒家有人。片石青山足傳信，肯教悞鼻獨稱仁。

次韻題湖廣參政閣里帖木兒詩卷

萬古冤公若一辭，人心真偽豈容欺。義當為處戒無勇，天未定時疑有私。夢者覆蕉誇得鹿，獵夫吹竹會逢羆。東隅已逝桑榆在，廷尉從教愧釋之。

題三原張周卿孝義卷

人生孝義本天衷，踐履當由學力充。風化日回三代上，春和今萃一門中。繁陰已見滋芳桂，餘潤猶能及轉蓬。此去佳名藏不得，涇橋明月照無窮。

高麗僧無外扣馬求詩口占授之

墨儒名行吾能別內外有無師自知萬里歸來仍是客眾緣消盡
未忘詩雪泥留迹鴻飛遠雲海連天鶴度遲莫使鷄林專紙貴好
將新句寄京師

送同年趙繼清赴潮州推官

五十六人同擢第年來南北幾升沈潮陽合有文章士吾子初無
富貴心殿鱷又當勞筆陣化鵬誰信困蹠泐君家自昔傳清節更
要貽謀後視今

送王從義赴東平總管

東府多儒冠列州凋零今似葉經秋田廬復值連年水牧守定懸
千里憂教養正思吾子去循良當向古人求政成自有如椽筆擬
作歌詩頌魯侯

如上京

驛騎年年徧兩京但慚無賦繼張衡出城便與青山會涉世惟催
白髮生新雨煙蕪皆秀色嫩涼雲樹已秋聲尊空客散郵亭遠恰
是思家第一程

午日過桑乾嶺

酒香蒲嫩負龍城却得西山勝處行地入高寒疑節換路逢奇絕
更詩成緬懷勺水湛忠烈何幸清時扈聖明眼底羈懷又無奈林
間時聽子規聲

題苑彥升南野園

心間人境自無諱誰向明時學種瓜身外有求惟是酒園中無地
不宜花山林捷徑難投足天地行窩便作家莫遣鷄聲驚夢覺軟
紅塵土又東華

題昌平劉諫議祠

一卷春秋兩鬢皤丹誠貫日口懸河策能匡世時不用天寶厭唐
人奈何自古大材多薄命而今我輩亦登科可憐薰腐俱塵土得
似高名永不磨

六十里店飲脫別夕大夫帳

綉箔紅飄輦路雲竹櫺清度屬車塵天窗下瀉風如水月榻前留
草作茵仙府瓊漿料沆漉太官珍脯擘麒麟醉歸躍馬桓州道誰
信繩樞槁項人

宴慈仁殿周覽山川喜而有作

累朝仙帳似星纏咫尺鈞天別有天龍虎岡陵圍不斷鳳鸞樓殿
鬱相連翠榆舞影交馳道紅藥飛香入御筵螻蟻小臣無以祝兩
宮聖壽萬斯年

從左大夫奉命郊勞右大夫太平王野宿灤都西北二十里

地曰察吉兒馬禿與雲莊治書同帳明發疾驅馬上飲漣有
作

斗帳幃幪僅二人薄羶藉草幾時溫夜深露逼身如洗天近星垂
手可捫一瓊寒泉均盥漱半囊餘漣了饗食言歸自是人無勇茅
屋空聞老瓦盆

左大夫獵得兔

大夫銜命下天墀小試元戎短窄衣風日半寒人半醉山川如畫
馬如飛四圍遠勢周陸合一片歡聲得俊歸小技成擒何足道豺
狼多少緩明威

陪右大夫太平王祭先太師石像像琢白石在灤都西北七
十里地曰旭泥白負重臺架小室貯之祭以酒漣注口徹則
以肥鸞周身塗之從祖俗也因裁鄙語用記異觀

石琢元臣貴至堅元臣何在石依然巨盃注口衣從濕肥哉塗身
色愈鮮范蠡鑄金功豈並平原為綉世誰傳臺前斬馬踏歌起未
信英姿在九泉

謝右大夫贈馬

王家駉牝幾三千撓贈賓僚日屢牽方念何功勞駉騎况承高義
薄雲天愧無詩謝如張藉只有驢乘笑浩然不用都人行且避看
山吾欲裊吟鞭

飲左大夫家有高昌僧能琵琶合曲而又善薩俾佐尊馬

栢霜花月勢相違紅袖何如破衲衣音響偏聞仍梵唄談言微中
寓禪機一時遂悟忘形樂萬事無過盡醉歸未信色聲俱是幻更
煩青塚吊明妃

和閑閑宗師至上京韻二首

建瓴天下奠皇都聖祖神功曠世無灤水清浮金闕動蹄林晴射
錦雲鋪自憐簪筆螭頭近深愧盤空鷲影孤却望居庸南去路瘦
田茅屋杏荆湖

夷夏襟喉控兩都兩都形勢漢唐無垂衣已定千年治封事仍求
萬字鋪香殿晝閑雲氣合瓊樓天迴月輪孤太平裨贊慚無策猶
幸人間有五湖

至順辛未六月見

文宗皇帝於大安閣後廊甲戌夏重來

有感而作

修廊晴旭射紅塵燕坐曾朝蟻虱臣靜憶玉音猶在耳絕憐金地
只傳神橋陵弓劍成千劫灤水旌旗僅四巡大聖繼天春萬彙感
思無奈淚沾巾

奎章閣

先帝憂勞總萬幾退朝游息不宮闈
球琳瓊瑤開元圃奎壁森羅拱紫微
圖史聖功方未已乾坤神器處長違
貽謀有道心無憾千古中天日月輝

除奎章閣侍書學士中臺奏留戲簡閣中諸老

盛世真材藹鄧林天容擣散厠餘音
鑿坡風月無清福烏府冰霜豈素心
空使羣賢留半席不教敝帚值千金
萬年奎壁光如日歲晚斯盟肯再尋

龍岡賜燕以下二首和吳宗師韻

至元新制漢官儀萬馬東西歷翠微
初服盛裝三日燕和鈴清振九旂旂
明珠火齊輝棕殿上醞珍羞及布衣
但願普天均此樂莫拘千里詠邦畿

謁太子宮

五雲東郭起青宮仙仗旌旄掩映紅
少海波明花萼盛廣寒天近桂香通
談經敢厠鑿坡客毓德當延鶴髮翁
恩遇等閑過設醴玉觴德酒注新醕
予病止酒乃以玉杯賜馬酪

龍岡侍燕和張孟功員外韻

山川宮闕古無雙列騎如花簇葆幢
一派簫韶來月窟半空金碧啟天窗
神仙畢至朝圓嶠寒素從誇燕曲江
聖德鹿鳴歌不盡願言懷寶莫迷邦

客舍漫題用前韻二首

國士南金未易雙塞鴛何用逐麾幢
誰教茅屋煙霞迹也到玉堂雲霧窗
鴻鴈夜寒思楚澤鱸魚秋美夢松江
羈懷正賴詩排遣曹鄴甯辭淺陋邦

夢澤山田二百雙花為屏幃樹為幢
朝遊常有雲隨屐夜飲猶邀

月入窗半世謀身憐下策一時飛夢過長江愁來矯首西南望好在釣臺煙水邦

分臺上京往來宿洪贊徐千戶家愛其雅潔留詩於壁

樹陰清入小窗幽洗盡風沙出塞愁桑下本無三日夏尊前忍負一庭秋山含晴靄青未了花謝夕陽紅欲流迹印雪泥聊復爾鴈臣明日又神州

白髮

蒲柳由來不耐秋詩斑酒禿更相讎初如春雪微微見忽似昏星漸漸稠攬鏡甘投衰境去簪花難繼少年遊到家應被卿卿笑從此明窗鑷未休

儀真寄王可毅叅政

鶴磯衝雪別君時欲浣離愁不計盃征纜已維淮甸柳小瓶猶插

漢陽梅江山到處渾如昔軒冕何心又此來翠鶴峰前紫荊樹春風回首望栽培

庚申除夕

燈殘香盡更躊躇須到鷄聲歲始除青鬢明朝三十五白雲南紀六千餘未能免俗聊尊俎豈不懷歸畏簡書兄弟無官常在側區區養志果何如

律詩

巡山次王君實戶部韻

鬱葱佳氣藹神都
千騎焚煌日出初
禾黍封墟無犬吠
風雷巖壑有龍居
清時僚佐宜尊俎
明日塵埃畏簡書
最是忘歸奇絕處
白蓮如畫碧潭虛

題林春野草堂

湘煙勻染綠蕪新
着我誅茅管領春
竹淨花深長閉戶
詩成酒熟便招賓
杜家西郭今誰主
戴氏東池又得隣
此去不煩王錄事
郡庠應有買山緡

送李裕

天歷初曾守北門

堯蹇家世見儒冠
投筆猶能赴急難
南紀風雷旗影動
北門霜雪

柝聲寒床頭轉眼金隨盡眉鼻蒙塵墨已乾却有人間真樂在壽
萱堂上好承歡

過明里董阿平章玉溪亭次劉楚奇韻二首

玉驄久已倦沙堤丹鳳來因覽德輝富貴未問無足美驅馳將老
要知歸春風北海尊常滿夜雨西湖水正肥宇宙此亭心事了古
今明哲貴知幾

曾作人間濟海匏歸來端欲老西郊田皆種秫資鯨吸手自我松
待鶴巢尚恐山川難入詠焉知魯史不為嘯高情已分門羅雀却
許儂過仗策敲

昌平觀光樓

樓前駟騎漲紅塵樓上嵐光入酒樽肺腑幾重圍上國襟喉一路
控中原帝王不恃關河險玉帛常隨輦轂奔要看煙光凝紫翠關

干倚徧待黃昏

遊昌平憇縣學歸過朱都督碑

木葉纔霜水不波偷閒今日遂婆娑清秋林壑斜陽好豐歲郊原
樂事多秦塞已隳仍郡縣武城雖小有弦歌却憐一片朱家石千
古涇原臭不磨

居庸關

老子觀山亦有緣居庸來往涉三年清泉翠壁俱無恙皓首蒼顏
漸可憐輦路雲霞秋富貴離宮花草晚暄妍大夫不辨升高賦自
作移文第二篇

再宿洪贊徐千戶家用舊題韻

四面雲山一徑幽停驂真可釋羈愁鄙人千里回俗駕此地兩年
逢仲秋無策不須干北闕有懷都合付東流故鄉莫喜并州近松

栢佳城在相州

白志仁教授孝行公嚴檢校文也

士生為學學何為百行皆由一本推竭力但思供子職明倫方可
作人師乾坤恩德心無盡宅里光輝我豈知自是慶門流澤厚已
傳書種到佳兒

送胡彥誠赴陝西憲使彥誠為雲南參政朝京值代俄有是

命

故家喬木與雲齊並葉流芳幾折圭滇水鵲巢鳩已據岐陽烏府
鳳還樓百年勛業青冥上一夜關山紫氣西驄馬繡衣行莫止秦
川黃草漸萋萋

過宣德

一簇人家映酒帘平沙漠漠草纖纖疎雲漏雨只數點遠樹隱山

餘半尖春盡詩因愁裏減地偏寒比夜來添眼前亦有娛心事徧
野酥香酪正甜

簡秋碧孔林管勾修殿有勞諸公請作詩美之

一檄何曾綠爾袍便馳聲譽動時髦事逢強力難皆易官在聖門
卑亦高自是寸忱殫職守敢煩多士頌賢勞因知天相斯文意如
許靈光但野蒿

漁陽

天寶君王日醉眠孽臣遣此握兵權金蟄蟠腹思吞月鐵騎騰雲
怒射天靈武功成凶已盡曲江人老事空傳慘澹聲嘶千年憾荒
戍蕭蕭起暮煙

曉過九弓嶺

長途無處避紅塵泉石相逢意便親路轉好山常在眼林深幽鳥

不驚人半空雲樹斜撐月滿地煙蕪細染春慢鳥吟鞭看青壁此行猶比畫圖真

曉過神山

山色冥冥驛路長天光雲影曉蒼涼荻花噴白夜經雨黍葉半殷秋欲霜男子未應巖穴老山翁休笑簡書忙却憐作吏妨幽討辜負奚奴古錦囊

次荊州

野風吹盡舊昏祆懷古長歌慘不驕紅樹郊原秋瑟瑟黃雲關塞晚蕭蕭驛程三日馳千里樂事百年能幾朝髀肉暗消時自笑不應詩瘦沈郎腰

江南察院梅

不到江南十五年眼明初見玉嬋娟天寒歲暮人如削月落參橫

骨已仙既遇風霜為真賞從知花草敢爭先廣平漫說心如鐵一賦清妍遠更傳

中秋偕魯子翬御史飲僉憲張允謙宅張以中字為韻徵詩二首

好景天教二妙同興深殊覺酒無功月涵萬頃水雲裏秋散一庭風露中此夕清光徧天下他年佳話獨河東不須更上神山去氣翳而今已掃空

良時一笑已難逢况復樽壘得侍公樹影涼篩吟席上桂香清灑酒盃中碧雲不歎人千里玉漏方催鼓二通怪底詩成清似水憲臺原是廣寒宮

偕監州諸君獵

山州談笑了官程射獵消閑喜得朋日薄寒清人力健草茸坡漫

馬蹏輕老狐脫網還逢犬狡兔傷弓尚避鷹政恐名藩無此樂燎
毛燔肉醉班荆

送可與回武昌

昔人貴別強忘情不道中年百感生洹水先塋時拜掃沙羨新屋
待經營已知肯構為賢子慎勿膠榮似繆兄早晚君恩聽歸去鶴
磯樽酒好相迎

贈寫真微上人

禪師胸次玉壺冰閱盡妍媸寓典刑正法眼供三昧手長明燈取
萬殊形直教對面人忘畫却是無心筆有靈老我莫為朝貴看雲
山宜着鬢星星

次秉彛見寄韻

蠻獠猖狂敢弄兵細民水旱不聊生一時匡世無良策萬里催歸

見至情老屋有書甘獨善扁舟何日遂相迎近來物理真泰透拋
却浮名事事清

送湯同知之甯都

鬱孤臺上望甯都但見青山畫不如山接越天雲有瘴地非衡浦
鴈無書蘭舟夜月明雙鑑竹馬春風待二車休把鋤奸號能治至
誠真可及豚魚

送張伯康降香龍虎山修天壽醮用閑閑韻

官柳搖春驛路長紅雲飛護御封香九天箕翼開玄象萬里風煙
翳紫凰境勝宜為祝釐地松陰應滿讀書堂瑞歸好賦山中樂莫
使嗁鵲歌衆芳

寄題信州真慶宮用閑閑韻

五峯倒影碧搖空聚遠儲精擅一宮山上神仙司下土人間水旱

待奇功結巢盡是冲天鶴題扁猶存貫月虹山第一晦翁書漢他日
煙霞最深處半窗應許住詩翁

寄題程氏斗山歸來亭

世途多險更多歧只有歸途最坦夷欲領溪山甯待老試詢猿鶴
已嫌遲風軒月榭時時酒茅屋花村處處詩寄語歸來亭上叟有
人千里共襟期

送陶靜隱鍊師歸陽平鍊師蒙古人從祖母姓又因性慕弘

景圖句曲山以歸

句曲陽平俱好山山人新捧璽書還高風自出旌類表遠景旋移
圖畫問性慕隱君真有見心於元亮更相關披荆早構琳宮了却
伴雲霞盡日閑

和胡安常廉使盆池紅白蓮韻十首

小瓶添水澺締衣捧擁雙花炫碧漪霞臉勻香臨寶鑑仙肌凝雪
出瑤池便移七澤來堂下底用孤舟泛水湄見說文園詩作崇相
看吟到月斜時

不采芳華不製衣只憐幽潔濯清漪施朱傅粉各有態別壁翫雲
為此池羅襪更誰懷洛浦觥舡猶復夢湘湄便當疾力酬觴詠莫
待風霜搖落時

淨友同心異色衣聯芳駢美照淪漪一泓便有滄洲趣千葉如觀
太液池掌上風波清可掬眼前煙景浩無湄古來材大難為用不
羨花開十丈時

錦服亭亭對素衣圓窪涵碧濫風漪從知城市無多地只許鈞陶
作小池月影誰移廣寒上野情真到孟諸湄老夫更和臞仙句直
待花邊爛醉時

水宮仙子捲霞衣，搖曳香風亂。穀漪對鏡舞空鸞，綽約出簾流影。
燕差池遠，煙不隔人千里，斜日猶銜玉。一涓老瓦濁醪先醉倒，那
知方口釣魚時。

靚粧還逐紫綃衣，共愛寒泓翠。不漪湖石紫圍連，島嶼碧瑤翻濺。
似圓池莫嫌高，蓋無千柄亦有浮萍蕩。四涓昨夜雨聲秋，欲碎對
花那忍負良時。

紅粉娥娥擁綠衣，淡隨姑射翫。瀾漪日華動影，搖書几夜吹飄香。
到被池尺地，貯雲無盡處。纖鱗環水不知涓，莫嫌盆盎人間隘。畢
竟天涯有到時。

玉佩霞裾雲滿衣，香奩聊共弄。寒漪書齋自笑有蛙井，相府不須
誇鳳池。坐久清風生兩腋，夢回明月印重涓。人間震澤空如海，未
是花神際遇時。

曳杖看花振絳衣，不慚霜鬢照紋漪。蓋雲擁翠浮杯面，盤露分清
與硯池。拍案小山渾倒影，護階幽草亂交涓。老翁肯作兒童態，却
是青蛙得意時。

西風未忍裂鶉衣，且助妍華細作漪。常笑孀娥專月窟，誰教仙子
共雲池。華峰青壁憐無路，坎井蒼煙自有涓。把酒對花仍好客，主
人仍似鄭當時。

貴溪倪俊仲作生墓築室其傍多種竹樹扁曰慶源道院日
居其間以待終焉

人生七十古來稀，過此誰能必後期。泉下春風無盡藏，世間華屋
有傾危。清陰可愛偏栽竹，習氣難除剩賦詩。一視死生雖曠達，眼
前樽酒亦相宜。

宿遵化驛呈同行友人

簿書奔走了皇華已信鈎刀勝莫邪京國五年三出塞羈窗十夢
九還家愁眉常感詩頻草喜事不來燈自花酒盡更沽君莫惜人
生分手即天涯

秩田未登連日不飲

陋城春事易闌珊連日無由一破顏晴少雨多花不耐量寬殘窄
酒常慳渴心幾欲雄吞海醒眼應教細看山便效淵明多種秫高
情千古自相關

病後縱步

閉門十日謝紛譁驚見郊原換物華嘉穀偃風斜吐穗老葵經雨
卧開花瓜茄健咲新拋藥杖屨安行足當車便好偷閑了詩債鼓
聲明日又催衙

題番禺胡氏嘉樹軒

隱君夢不到槐柯獨愛楓林日撫摩百歲故家喬木在一門陰德
善人多吳江漫假詩傳爾漢殿其如世變何便好續為嘉樹傳慶
源流溉有餘波

題杜縣尹義瑩

生且無情死益輕豈知埋齒著前經君侯不展春風手逝者能寬
烈火刑已辨治功書上上更推陰德到冥冥老天報施初非遠三
品諸孫已刻銘

題叩城鄭志道義學

禮殿巍巍俯鱣堂都教晉鄙化賢良澆風自可回千載善士誰云
隘一鄉但念人心皆孔孟豈憂今代不虞唐維桑與梓猶恭敬况
見君家此義方

馬家洲望大別

煙波目盡渺茫間已認青青大別山山下故人應久待天邊倦鳥
恰知還喜瞻禹栢凌雲翠却笑吳霜染鬢班寄語舊時詩酒伴此
來真得共高閑

詠可行手栽牡丹書其壁

花是星郎手自栽鞞紅玉板滿層臺臺中幾朶已半吐天外片帆
猶未來歌管春風閑繡幕門闌夜雨長蒼苔背陰留得芳華在應
待同持瑪瑙杯

雨中登樓二首

夢回黃鳥語間關喚得幽人不暫閑曳杖去穿花下路登樓來看
雨中山天浮遠樹青無際雲捲長風暝不還樂意滿懷詩滿眼小
園春色正斑斑
柴門雖設却長關客少詩多恰是閒徹地深情開月沼可窗濃翠

着雲山撫松藉草時行坐踏絮披花自往還午睡覺來銀鴨冷香
薪旋削鷓鴣斑

閒居雜詩四首

鬢髮蒼浪齒動搖自知宜退待誰招茶餘引鶴消春晝酒醒聞鷄
記早朝肥截玉肪羹縮頸香翻雲子飯長腰尚嫌門有徵詩客時
與山人破寂寥

半山雲樹接修篁鎮日無塵到草堂菴牖風來書葉亂膽瓶花落
硯池香壺鷓自酌教微醉松菊猶存及未荒護果灌園常不暇誰
知閒裏更多忙

鷓山東北接郊墟郭影嵐光畫不如九十日春朝暮雨兩三間屋
古今書庭花紅礙經行處園竹青回翦伐餘滿地蒼苔愁踏破年
年深喜故人疎

竊祿多慚號具臣歸田何幸作間人
登山臨水今非客病酒愁花
又過春夢斷紫霄黃閣遠眼明青鏡白頭新
芥臺竹笋來相續不道茅柴味更真

至正集卷第十七終

至正集卷第十八

律詩

和傅汝礪見寄韻二首

江水舟航日夜東故人音問得常通
君才能挽千鈞筆我老惟懷一畝宮
自古山林容小隱只今臺省有諸公
欲知別後詩成處都在花香竹影中

春紅園圃眩西東花下縈紆一逕通
不向雷門搥布鼓要從人海見珠宮
多言浪負三千牘老夢都忘十八公
珍重吾宗有成訓人間何似在山中

雨後行小圃

一徑縈紆踏城沙手分竹樹亂交加
門庭無客恰遂懶城郭有山尤可家
江梅結實青於葉海榴發芽紅似花
盆池才著斗許水其

奈聒人多少蛙

青山高竹樓別業昔嘗題詩其壁詩故在而竹樓物故三年矣感而賦詩

故人別墅俯青郊曾許幽人近結茅苔蘚柳荒留舊壁竹林雲轟見新梢樓成白玉山無主鱗出黃金客有看悵念同遊歌楚些風聲蕭颯鳥咬咬

題竹樓墓

青冥垂翅共傷心况是寒宵早盍簪十載故山曾有約一朝喬木遽無陰先塋在眼雲林合孤塚回頭宿草深千頃畝鍾何所用故人徒辨淚沾襟

青山書懷

不見青山入七年眼前風物故依然乾坤逆旅自無量松竹主人

俄已仙山色遠明新雨後松聲清到小窗前淮南種柳桓司馬白髮重來亦可憐

和劉光遠韻二首

自笑閒人有底忙韶華無盡待詩僧旖旎炫世真如夢巖壑留題有夜光北闕上書聊自試南方論學尚多強故人桃李何飄忽荒却平生幾處莊

霜袍泥輟半生忙夙願而今且一償海上有樓皆暮氣人間無劍是龍光山林到處何肥隱德業終身貴自強何用門前栽五柳但存松竹即吾莊

青山回途中即事

風日清和眼界寬碧天無際遠浮山田疇得水雨初過籬落有花春未還樹影半涵清淺處鳥聲多在翠微間不因三日盃盤盡老

子遊嬉興未闌

汪華玉為撫州經歷其父梅隱就養未幾歸孝感虞伯生揚
賢可有詩餞之過鄂求詩次二公韻以贈梅隱用子貴
贈縣尹
推恩就養樂耆年教育功成本父賢松受官封仍偃蹇梅從人隱
更嬋娟子能力辨臨川幙翁喜空回夢澤舡歲晚過從應有日眾
芳搖落更暄妍

人間官爵總虛名樂在天倫恰是榮封縣不將息作幻還官自有
鶴來迎山中酒已三年醞江上舟才幾日程我卜菟裘近仙里願
從鄉舍慰平生

和大別石壁禪師韻四首

禹栢撐雲振古青老禪相對各忘形午茶香動風生席夕磬聲沈
月轉亭欲借閒田同放浪先承佳句慰飄零漢江秋色將清澈莫

負沙頭雙玉瓶

欲來大別轉青青老眼憑高貌萬形物外尋常清濁酒人間多少
短長亭勝遊要歷千年徧涼意方催一葉零我羨鴟夷差解事井
湄誰道不如瓶

蓬鬢從知不再青人生何苦自勞形鑿渠引水來花徑種樹招雲
護草亭風景宜人新領畧交遊回首半凋零等閒得似空門樂一
鉢蕭然對一瓶

晴川芳草勝丹青天遣南來此寓形無地避人依梵宇有時乘興
到江亭山明錦樹雲猶熾天近金莖露未零殘暑滌除須一雨煩
師傾倒貯龍瓶

送元景悅赴茶陵州學正

青年肯與世浮沈試用才知造誼深載籍聖經垂道統此邦今古

號儒林不虞政似求全毀惟數母忘學半心後會鄙人當刮目莫
教輿羽勝鈞金

同劉光遠過漢陽

兩郡相望未惜遙片帆飛渡不終朝冰漸縈帶浮槎去霜氣侵凌
宿酒消何地不堪容杖屨此生端合老漁樵前村定有叢梅發時
送清香過小橋

陪晴江國王宴秀野園夜分醉歸

帶葉黃柑露未晞出罾鮮鯉冷添肥年來到處行樂好夜半絕江
乘醉歸湖海自憐豪氣在星霜轉覺故人稀嚴城小尉雖多事不
問鸚洲舊布衣

題徐復初竹西佳處亭

四山修竹總相宜何事尋幽獨愛西萬里風來龍起舞一輪日落

鳳來棲揚州陳迹久無夢江夏勝游新有題見說主人歸不遠好
開三徑徧扶藜

神山即事

京塵汨沒已華顛恰是山居第一年松月照窗詩入聖竹風吹榻
夢遊仙隨人久作悠悠者處世方知綽綽然尚愧未能忘口腹時
勞昆季致肥鮮

和謝敬德學士見寄韻二首

平生疎懶是天姿今歲春來起亦遲好酒或如陶靖節杜門深愧
鄭當時向來事業惟供笑如此風光忍廢詩館閣真才試枚舉鷓
山陪預恐難期

淡靄輕風弄野姿江天寥廓鳥飛遲從知宇宙多閒地誰信襟懷
勝舊時夜雨不驚通客夢暮雲猶入故人詩山中亦有陽春曲拂

拭朱絰待子期

得請歸出齊化門述懷

弱步豐扛遂息肩，聖君恩德大於天。
對廷已負三千字，伴食空糜幾萬錢。
野店尋詩先具酒，罪人逢赦更昇仙。
今朝拂袖都門道，江漢西塢有瘦田。

得請之難言不可盡，因得第二聯既出都門始足成之。

短髮年來坐苦吟，等閒添得雪盈簪。
百錢擲地皆成字，一芥投針適中心。
不是清時人棄置，自緣多病老侵尋。
賓朋應道予歸好，幾處壺觴候柳陰。

中書疑予行前一日既大設祖翼日又遣使具牲醴追送通州走筆付使者以謝諸公

梨園樂府太官羊病久餘醒，豈易當教學聖賢。
三宿去漫沾牲醴

一舡香已知腹負將軍久，更笑詩酬使者忙。
此去江湖足魚蟹，故人天上貴相忘。

始食蒲笋品味在竹笋上

渭川常美錦棚兒，盤饌今朝得此奇。
心卷清冰微有暈，肪裁寒玉瑩無疵。
水鄉甘脆應無敵，風味豪華定不知。
好與散人供口腹，休教長到作輪時。

小酌薦以巨鯽新藕蒲笋

肴蔬鮮潔酒清醇，病戒貪饒止半醺。
領畧江湖新品味，洗除腸胃舊羶葷。
心無多事尚營口，食到萬錢難報君。
藜藿乳豚同一飽，世間何物不浮雲。

直沽買魚其錢十倍都城

錦鱗堆積照行庖，羹膾隨宜飲老饕。
自是窮鄉如土賤，莫詢頰尾

為誰勞小兒却憾辭官晚貪僕猶嫌索價高因歎人心何太忍更
教烹煮自輸膏

舟中午日憶去年此日過柔乾領有詩因用其韻二首

軒車穩出九重城一舸搖搖載月行節序迫人無可樂詩書用世
竟何成清風遠樹黃鸝轉落日滄波白鳥鳴休弟湘纍歌楚些老
夫親和扣舷聲

去年馳馱度長城豈意扁舟遂此行一笑病餘仍酒困幾年身退
為功成管花管竹心無老觀水觀山眼尚明好在衡茅不歸去松
風誰聽月中聲

詠陶郭

元亮子儀俱作令一居彭澤一中書中書考歷二十四彭澤日才
八十餘昔人入建有深意易地行藏無異間愚哲古今霄壤隔希

賢惟是賦歸與

晚至舊縣

笑據胡床看落暉水風蕭颯動絺衣鐘鳴煙寺片帆落鴉滿雲林
獨鶴歸小店旋蒟醔酒軟濁波新出鯉魚肥莫言傾倒鷄豚社此
樂雖微世已稀

歸至鄉里拜先塋

多病承恩聽避賢得攜兒女拜垣阡無親底用過三釜有淚無由
達九泉故里山川勝圖畫佳城松柏護風煙立身揚顯愚何敢且
幸歸來不辱先

出郭

萬事勞心雪滿頭還家纔得事遨遊太行雲盡清浮曉洹水霜餘
碧染秋漸老始知閒有味此回真與世無求溪山好處鴟夷滿况

有風流老郡侯

謁韓諫議墳

考譜披圖總未真，兩回親得拜公墳。
降神生作三朝相，聚氣虛為五色雲。
宅兆發靈符厚德，碑銘無愧有奇勛。
憑高更欲推形勢，遠樹嘯鴉不忍聞。

墨竈山次杜緱山先生韻

丹霞圍鎖翠潭潭，仰面青天鏡出函。
解組已能辭好爵，判山還欲署新銜。
冷傳霜信風生谷，清透雲根月滿巖。
却憶江南舊林壑，幾回煙霧護松杉。

峒峪山寶嚴寺二首

擇勝何年著梵宮，日窮猶未盡重重。
翠紅照耀三千界，屏幃周圍十二峰。
雪澗清泉響寒玉，雲巖喬木轉蒼龍。
尚憐不盡登臨興，天際危亭見五松。

際危亭見五松

煙嵐融翠濕濛濛，石路縈紆細入空。
明月百壺松影下，清風一榻水聲中。
聖燈不為吾儕見，俗樂誰教釋子通。
兩宿豈能窮勝事，山門愁見馬頭東。

次王君實都事韻二首

故老凋零似曉星，遺懷誰和短歌行。
直教松檜空雲壑，猶逐衣冠戀玉京。
金井夏闌冰未泮，紫垣天近月偏明。
可憐門下三升酒，不信能澆磈礪平。

五車未試髮先華，秣米何能効國家。
已愧傳巖陳麩蘖，欲從勺漏問丹砂。
內官時餽雲腴釀，南僕能烹粟粒芽。
回首燕都天咫尺，有人深夜候燈花。

和伯生韻贈崇真宮魏道士

身已支離髻已了夕斲沆瀣曉餐霞人間白髮不能黑方外青山
便是家上谷荒林惟有石天台流水久無花崇真宮裏相逢處欲
扣真詮日又斜

代祀壽甯宮贈蘇侍郎

粉闈長日簿書閑禮法拘人一笑難天子九重頒信幣侍郎三日
佐祠官茶餘延話風生塵朝退哦詩月滿壇但憾無緣駐清景雲
璫聲斷燭花殘

遊魯國大長公主園

公主乘鸞已上仙手栽花木尚依然滿階紅藥春無恙夾道蒼松
老愈堅鄒子能回寒谷氣韓湘曾握化工權繁華過眼君休羨華
屋山邱正可憐

六月朔留守官進芍藥

六龍到處是陽和上苑名花得最多羅帕籠香來繡宸玉瓶添水
付仙娥開遲只是留春者養小其如玩物何昧死一言臣有獻中
陵今日富青莢

得家書

別來三旬屢得書書言不盡意勤渠一瞻安字憂成喜幾向明窗
卷復舒兒學女工俱有進廩儲囊積任無虞歸期只待秋風起一
束離愁即破除

次伯庸韻答王可矩左司

乾坤開闢壯神州季子重來已敝裘太古山川渾是畫廣寒宮闕
最宜秋人間濁酒難為醉海上靈槎尚可浮深愧清時無寸補但
形詩頌繼商周

寄趙伯甯中丞

走馬灤京獻納來翠紅鄉裏得徘徊行厨無物非君賜相府有花
皆手栽休憾相逢還判袂且圖一見便銜杯雪林好在秋風菊應
耻芳醪待我迴

王致和鍊師將歸四明求詩為贈

宣室年年侍祝釐鄉心空逐白雲飛壺中有宅聊為隱畫裏觀山
未是歸京國春風元髮改鑑湖秋雨紫萼肥巖前手植青松樹為
問而今大幾圍

寄閑閑宗師

崇真宮裏幾徘徊底事詩仙望不來檻擁翠雲惟枸杞庭閑青畫
有莓苔平生多誤依劉至老子真如訪戴回善視黃花多備酒今
春已負牡丹開

和謝敬德學士八關至上都雜詩十二首

培塿累累幾附庸一關獨在碧霄中九十保障空秦塞二百山河
護漢宮天近馬隨雲上下峰同人忘路西東頻來傳吏渾相識但
訝終童變老翁

眩目巖花落又開避人幽鳥去還來山僧餽餉惟清茗石媪衣裳
滿綠苔琴峽注泉成樂奏梵書隨石盡碑材前途定憩榆林驛遊
子休歌標有梅

雜還牽黃復碧蒼清晨校獵陣雲長一圍塘灤如平地五月郊原
有肅霜飲至幕庭羅酒澆周陟飛騎謝津梁先生已得毛錐力更
欲崆峒倚步光

逐兔弓良不用蹄種蒼坡峻馬能犁土山無樹遠如近沙路有風
高又低幸遇清時免投筆却憐華髮不勝笄寒暄南北都休校一
醉當令萬物齊

涼亭雨過長蒲茸使者求魚月向東黃鼠頓肥秋後草海青多逸
曉來風庖羞水陸八珍聚琛貢梯航萬國通射獵甯非男子事莫
言丁字勝強弓

閶闔紅雲蕩蕩開天光萬象被昭回東風清暢來三島西日微茫
認五臺沙果荆藍資上谷玉醅金竿渴懷來茂陵可笑徒英武歡
樂當知極便良

上苑蒼松受雪敬石城畫角帶霜吹人雖狗監知文士世是鴈房
襲小兒梵刹能司天禍福經筵時論國安危豐扛弱步歸無勇退
食多慚詠素絲

聖德如天萬彙新遠柔窮漢會宗親錦鞬掣紺蒼鷹健玉輅鳴鑾
白象馴北闕風雲遭泰運南宮星月有詩人秋期應放疎慵去不
望分符綰玉麟

鴈落長空迹篆沙鳴嚆驚起一行斜小車細馬醉時路豐草甘泉
到處家已解皮囊傾馬漣更搯銀鈿試龍茶玉脂響泣魚羊熟章
觀風香野韭花

翠樓天際鬱崢嶸粉澤龍岡壯帝京地勢遠連棕殿起簷牙高並
鐵竿撐蔥蔥佳氣歸環極穆穆昌期見迂衡長樂退朝容緩轡斷
雲收雨半山明

長日官曹似馬曹絲桐時得事吟猱救時乏策當投紱遣興成詩
敢奪袍白海波隨秋雨漲黑山雲壓晚虹高
清尊常滿朋簪盍誰道馳驅我獨勞

尚服三庚進紫綃清冰沙底未全消魚龍陸海無宮市鼓吹鏡歌
有徵招自在千年蒼鹿健闌粧三日玉驄驕最憐學士神仙福終
日吟詩不造朝

律詩

省中對雨獨坐

風土迎秋便作寒，隔簾飛雨更斑斑。
可人几榻清如洗，終日情懷淡似閑。
窗影天開千丈闕，牆頭雲放一分山。
腐儒獨坐成何事，寫出新詩亦強顏。

寄趙秉彝

從軍苦樂不難明，肯使毛錐負此生。
鐵騎蹴雲秋枝獵，油幢敲雨夜論兵。
髮應瘴癘催全白，詩為江山助益清。
詔下凱旋今有日，阿綿聞已候門迎。

紫菊和伯生韻

天賦幽妍處士花，誰將朝服苦相加。
薇垣有露沾秋色，芝嶺無霜

抗日華嶼出更宜彭澤酒筭香誰羨建溪茶坡仙一語推醜蔑只在姚家與魏家

崇真宮葵花

繞砌亭亭畫影閑相逢幸及未開殘紅粧洗露尤宜曉素性傾陽不畏寒聖化薰陶等燕越仙家培植有殷韓江山信美非吾土且向西風笑倚闌

宿洪贊徐千戶家再用舊韻

半生塵土阻尋幽常羨幽人不識愁花卉地寒多及夏軒扉山近鎮含秋謀身未辦三間屋濯足何須萬里流此去此懷休戚戚好從高士老南州

喜聞可與至京

鶴樓東北望燕城幾處關河幾日程四載三回勞遠慰兩都千里

尚難并開書報喜身常健見我應憐老可驚咫尺對床風雨夜此懷多少待君評

鶴磯解舟二首

年來心迹已蹉跎尚憾閑門雀未羅夢裏雲開衡岳曉眼前水落洞庭波三山黃鶴九天去兩岸青帘一棹過此去不煩漁父問酒闌當和扣舷歌

沙羨湖上有漁蓑又買南舟意若何城遠愈觀樓閣好天寬惟覺水雲多江山窮勝心猶壯塵土迷官鬢已皤不怕寒燈挑夜雨羈人今入散人科

金口驛和董仲達壁間韻二首

不須荆棘歎銅駝且對溪山卷白波千載文章誰屈宋一天風物苦陰何詔歸自幸身猶健賈售從疑貨未多安得之人挽椽筆為

予揮灑醉時歌子仲達進士南臺察掾工於書從
休笑劉才似疥駝却曾學海有餘波老來拈筆聊復爾身後得名
能幾何彭澤田荒攜酒少漢江舡小載詩多故人若問南行事要
續浦湘欸乃歌

宿鴈州和黃文復韻二首

久佩葱珩從八鑿故人今始接餘歡蕭然華髮已呈老敬矣黑貂
猶耐寒歲晚江空知已在調高絃絕嗣音難天涯儘有荒涼處政
爾幽人興未闌

透空漁笛一聲飛天水迢迢醉眼迷萬頃蒼煙沙鳥沒半規紅日
竹鷄唬狗名今古有蕙苴行路江湖無蒺藜但得魚羹了心事等
閒誰更析人圭

泊茅步和文復韻二首

少日身名恐陸沈因成漂泊到而今腐儒何預世路險故人不來
江水深白鳥破煙三四點紫崖崩雨幾千尋茅舍竹籬梅正發天
寒日暮負登臨

一舟窮日走三湘忙每思閒閒又忙水帶雪來巫峽近鴈拖雲去
楚天長賦歸後世知元亮干祿當時笑子張底事鱸魚徧得味幾
年沙漠飯東牆

茅步和劉光遠韻二首

已知行潦愧長江猶抱初心不自降半世有詩多在客萬言無策
可興邦霜風寒奪茅柴味澤國清傳欸乃腔珍重湘翁招我隱已
栽松竹近漁缸

片帆十里泝寒江湖海元龍氣未降萬頃風濤縻客棹一天煙雨
畫漁邦瓶梅為我香浮坐尊酒著人春滿腔醉墨淋漓隨廢擲不

煩為礎復為砥

發臨湘和文復韻二首

霜空鵬鷃任橫飛，倦知還尚未遲商。嶺老來芝可采，葛陂歸去竹堪騎。徜徉方外無何境，收拾人間不盡詩。坎止流行隨處樂，何須三匝揀寒枝。

宋鷁從人笑，退飛湘君有約。怪歸遲，雲間鳳鳥難羅致。天上麒麟好借騎，駭國幾回悲落木。君山明日要新詩，梅花樹下旗亭酒，莫羨江珣與荔枝。

登岳陽樓

半空輪奐壯巴邱，消得騷人一繫舟。雲氣遠攜湘雨至，湖光寒入蜀江流。山川信美非吾土，天地無窮有此樓。三十四年如夢過，可憐華髮賦重遊。

君山阻風

兩日肩輿興未闌，孤舟留滯亦成歡。洲添沙出寺逾遠，風捲水面湖欲乾。醅蟻綠浮春破臘，燭花紅落夜驚寒。天將增飾君山景，要我明朝雪裏看。

喜雪

陰風翦水夜霏霏，似愛遊人不遣歸。山學湘君為綺素，霞疑淵客獻珠璣。花開萬木春難畫，雲壓重湖凍不飛。水玉光中棹歌起，此行奇觀百年稀。

宿澧河口和文復韻二首

白頭新自日邊來，却愛荒寒野渡隈。澧水縈紆龍尾動，湖天空濶鴈聲哀。煙霞紫府高人去，風雪青燈好夢回。我欲長沙拚夜醉，莫教名利定王臺。

勝事關心得得來，繫舟常傍白雲隈。已憐韓子懷孤憤，更笑陳思賦七哀。楚國凋殘騷筆在，君山游徧酒缸回。江湖儘有歡娛地，莫問狂奴借釣臺。

黃陵廟

黃陵廟下草萋萋，水遠山長聽竹枝。末路不求同死處，重華甯有再來時。霜筠苦淚留千古，野樹愁雲接九疑。珍重韓公修廢墜，却憐微福類神私。

沂江日遇順風，或弭楫遊覽，則風為之轉，蓋偶然也。光遠形之詠歌，次其韻以矯之。

朝艤旗亭夕釣磯，溪山佳處故遲遲。酒清酒濁皆可醉，風北風南初不知。敢效精誠韓吏部，還如落魄杜分司。吾將弱水蓬萊去，莫引扁舟又遠之。

送吳彥皋歸瀏陽

可人才見惜分離，屈指同舟一月期。萬卷豈為干祿計，雙親正是倚門時。溪山踏雪真如畫，道路逢梅便有詩。莫把壯心縈一檝，青冥勲業舍君誰。

題張子玉湖山堂

洞庭湖上君山在，人愛湖山不暫忘。為問錢塘歌舞何如騷，國擅文章世間塵到尊。墨少天外雲沾翰，墨香更向瀛洲方丈去。回頭觀日出扶桑。

庚辰元日李文遠判州訪余琅琊，越三日同入長沙，值風雪不能進舟中兀坐，因次文遠見贈韻十首。

落魄三生李謫仙，丹墀曾見掃雲煙。偶無具眼甘懷璞，會有知音莫絕絃。風雪扁舟茶當酒，江湖清夢夜如年。不因同值東潭渡，誰

寫瀟湘水墨天

投紱歸來尉已仙山林隨處領風煙詠歌行辨三千首陶寫何勞
五十絃江水帶冰留別浦梅花衝冷報新年子長要盡追游興不
為朱陵有洞天

昔在通明造列仙袖香曾惹御爐煙輸贏難盡縱橫着緩急空調
上下絃自信襟懷如白水却憐勳業負青年鉉刀已試慚當俎何
處龍光徹九天

憶昨神遊挾羽仙世間遙指是非煙而今北海同樽俎何物東山
更管絃已遍九州知禹跡好專一壑老堯年東山骨朽長沙近雲
樹微茫水拍天

盧家茶椀未通仙目斷旗亭幾縷煙水調還宜綠簑舞吳歛何用
縻絳絃石瀧寒瀨如三峽澤國春風又一年但恨清漪亂柔櫓不

教都見水中天

勇退人言即半仙地偏尤喜接江煙野春殘雪開雙屐窗午清風
散七絃蓬島夢回仍是客汨羅魂斷不知年笑歌本自忘機事鷗
鷺怯人飛上天

交遊已謝玉堂仙楮拙爐深暖不煙司馬家貧尤有壁淵明琴在
任無絃驚心華髮成衰境回首青雲付少年飛出甕來還自笑醞
鷄今日恰知天

莫訝詩癯似浪仙却宜危坐看香煙山杯不畏深如海歸路方知
直似絃游止正當終九仞飛鳴多愧養三年振衣便駕長風去天
柱峯頭尺五天

處處江梅間水仙茅簷飛雪濕茶煙一時清興難回棹半夜去寒
欲折絃道路荒涼勞遠夢光陰飄忽歎華年定知天末相思苦人

在危樓月在天

琢句功夫似學仙丹爐真火久無煙
雨空野馬雲收幙目送飛鴻
手在絃客路等閑成好况水程時復問
長年後來記取論文地共對蓬窗一片天

天臨索錄事出伯庸詩求和伯庸薨三年矣

當年筆陣掃千軍要繼先秦兩漢人
孤塚此時多宿草九原何處覓停雲
紀功力疾猶能賦種德貽謀不待耘
底事房精遽淪化世間凡馬未空羣

送丁學錄之郴州用原功韻

鳳麟臺閣愧何成鷗鷺江湖却有盟
千載勝時須禮樂六經餘事到功名
我歸老境方從學子去修途莫計程
早晚春風滿芹藻肯教椰泮月空明

同年張雄飛僉事見訪醉後作詩贈之

鶴磯相見遽相違渭北江東苦夢思
四海同年幾人在三湘春水片帆遲
踏開雲霧來驄馬驚破煙霞聽老詩
桃李正濃風日好不拚沈醉更何時

藕溪候雄飛飲

柳塘花塢淨無埃翠霧紅雲撥不開
命駕每勞千里夢乘輶應挂一壺來
從知月下詩成苦不似山陰興盡回
多少風光先攬得杖藜行遍滿園苔

贈鳳山書院山長何明初

青年華髮分幽栖愧子贏糧若我私
奇字不知勞載酒清標初識勝觀詩
鷗林春色連紅杏鳳嶺雲香有紫芝
萬里修程先跬步春風歸騎莫遲遲

長沙北十五里瀏水至此折旋稍南而復北名駱駝背俗傳
圓則瀏陽得魁延祐初其形常圓原功瀏陽人果為魁人益
異之今貢舉中止予實與聞南遊過此感而為詩

瀏水東來北折旋人云奇應在同年奎文一夕忽飛遠沙背何時
再得圓背錦糝糊晴樹亂峯雲突兀遠山連世間萬事非人力鴻
鴻金沙更偶然

泊蘄口和仲達韻二首

湘山湘水兩無塵更值陽春播大鈞心到懶時多好况天教佳處
著閑人吾生已分為農圃此去何勞問鬼神布韞青鞋能事畢不
煩華轂與文裊

回首高軒愧後塵從知苦窳負洪鈞山川俯仰皆陳迹湖海過從
只故人病裏酒杯能作崇老來詩筆更通神王孫底事愁芳草政

要青青當舞袖

過湘潭

江邊楊柳翠潏洄柳外人家罨畫開一夜東風花落盡千年華表
鶴歸來暮雲山出遠浮黛春雨水添濃潑醅莫艤扁舟訪陳迹白
頭懷抱易生哀

過洲頭驛和仲達韻

一琴何用鎮相隨多事猶思過子期好句尋常無處覓希音今古
幾人知江湖春色動杯面風雨夜寒生被池此去衡南訪泉石蒼
崖應有少年詩

廷鎮約遊南岳期於淶口予先至艤舟而待因和前韻二首
衡湘風物要追隨忍負虞人一會期豈有鷓鴣倦高舉應憐猿鶴
未相知春山暖待穿雲屐夜雨清留洗玉池不為軒車故遲暮淶

江河日見吾詩

莫厭鴟夷到處隨百年光景幾相期老來任不愁三已閑裏金猶
畏四知舡尾夜寒魚撥刺塢頭春暖燕差池碧雲回首湘天暮不
道相思剩有詩

深口普庵堂聽廷鎮談佛

卓蓋朱幡老釋迦山林來治舊生涯清陰滿座日移樹精義入神
天雨花塵事已知皆土苴山僧誰訝不袈裟欲將洛詠從譏語又
恐春風去我家

次昭靈和仲達韻呈廷鎮

十載南枝與北風而今才得一尊同人間勳業非吾事歲晚江湖
有此翁雲岫煙波醒醉眼界花汀草負春工勝遊收拾奚囊滿才
信詩人道不窮

廷鎮倦於酬和作詩督之

早據文場擅老師相逢何事倦吟詩同年今日無多矣美景良辰
忍負之衡岳半天雲捧擁湘江千里柳參差艤舟好就旗亭醉禪
榻茶煙誤髮絲

衡州道中二首

高明未到祝融峰一路風光已慰儂修竹老松三十里遙岑疊嶂
幾千重燒纏宿莽晝不滅花噴遠香春正濃莫訝藍輿隨處歇老
夫形色要從容

一舍嵯峨見五峯出奇呈秀似邀儂雲深春護巖姿潤日午人穿
樹影重不遣山瓢隨我去却教材酒為誰儂少年陳迹無尋處只
有衡君識孟容

祝融峰與廷鎮鵬詠有懷原功蓋嘗約同遊而予不能待其

歸也

載酒窮躋最上峰
嘯歌聲撼海濤風
得陪五馬二千石
獨步三生六一翁
為問北門紅日下
何如南岳白雲中
寄詩幾欲申前約
無奈人生似燕鴻

廷鎮三十年前為南岳書院山長
今茲來遊予得侍行因成鄙句

三十年前楊洞主
禹門飛去一聲雷
白雲青嶂鷄林在
皂蓋朱旂虎竹來
歷問故人多不祿
絕憐喬木是親栽
而今芳躅誰能繼
塵滿皋比地有苔

贈南岳萬壽宮文天爵提點用閑閑韻

事才過眼都成夢
心但忘機即近仙
弱水風波三萬里
蟠桃花實六千年
有人獨得道中樂
無術敢為天下先
為我寄聲承慶老
江

南春在白鷗前

律詩

會真觀

萬壑千巖一水通
東風吹動碧溶溶
彌明到處曾聯句
同老何年此補鍾
滿地暖煙生細草
半天寒雨撼長松
道人不作遊仙夢
岳市花香酒正濃

水簾洞和仲達韻

濺珠噴沫雪霏霏
怒湧雄聲動翠微
一派衝開雲峽出
兩層分斷玉虹飛
家山夢到黃華峪
衡岳寒生白紵衣
我欲濡毫寫形勝
老來才調愧元暉

壽甯宮用閑閑韻

當年鸞鶴記經過
麗錦辭華出鳳梭
京國天高黃屋近
衡山春滿

白雲多扈行屢得聯觴詠奉祀時聞響佩珂老我一筇雙不惜為
言心事更無他

題曾原徐叔明山居

樓下田疇樓上山主人無夢到長安鮮鱗出水金三尺修竹穿雲
玉萬竿堂構弟兄皆杞梓階庭孫子又芝蘭瓌江精舍經營處要
與斯文共歲寒

江氏永香亭用廷鎮韻

夜不荒涼晝不譁一庭芳樹四時花高情早慕陶彭澤少態都忘
古押衙窗雨翠寒迷竹影洞雲紅潤出蘭芽人間多少黃塵路應
被東風笑鬢華

鄭元翁秀野堂

屋上青山列畫圖屋前流水響循除四時花竹野生意一片煙霞

護隱居歲稔客來須設酒日長耕罷却尋書北窗睡起扶筇出閑
看浮雲卷又舒

張山宗知事別三十五年今始一會且辱惠詩五首次韻答
之

當時豪氣薄雲天不位三台即列仙編簡古人誰勝已雲霄交友
盡忘年流光入鏡忽成老世路着鞭何用先綠水紅蓮行入幕休
忘秋菊與寒泉

息堂堂下桂槎枒晝夜常縈五色霞宗旨非傳小乘法文章真出
大方家受官俸少擅常冷問字人多酒不賒老友睽離已三紀莫
教容易答韶華

九萬修程負壯圖兔園依舊是迂儒偶乘逸興來衡岳敢效高人
泛具區夜月軒扉對松鶴春風薇蕨勝蓴鱸樹桑五畝生涯了不

用成都八百株

席珍求價售明時燕石誰教鴉自琦北海尊前著文舉南風扇底
避元規尋常得句即成樂七十休官亦太遲放浪形骸有成算沙
鷗從此莫相疑

湘水安流不肯波湘君應喜逸人過瘦如子美吟何苦狂比寬饒
飲更多百歲儘渠為話柄四方隨寓著行窩相逢一任頭如雪猶
可相從醉後歌

和文復送別韻

京國逢人問楚湘南遊誰憚道途長岳峯愛客陰為霧沙鳥驚人
集又翔夜艇載回詩夢去春衣留得酒痕香天涯莫道分飛遠回
首衡雲尚可望

叨陞左丞原功以詩為賀和其韻

干祿初心只斗升偶隨驥尾遽騫騰平生浪恃八叉手老去敢誇
三折肱玉案麻沾雲氣濕宮壺酒注露華澄鳳池不是藍田縣却
愧而今我負丞

和原功無題韻二首

夢斷春風萱蔻梢月明空室見蠨蛸塵封琴岳靜聞蟻香褪被池
寒折膠白髮而今嗟滿鏡烏衣何處更尋巢赤繩知在君侯手底
用持耆究易文

乾鵲何時噪樹梢著衣癡絕候蠨蛸畫圖留影鬢如漆錦瑟收聲
柱欲膠一覺十年驚蝶夢平生兩度毀鳩巢莊周豈是忘情者不
見咸恒未畫文

和閑閑承賜土尊韻

百年聲譽滿方輿萬里遨遊盡坦途風月襟懷冰雪句神仙官府

帝王都御香牘馥沾書几宮醞流春到藥壺我欲大書承慶事愧
無椽筆似君謨

鐵笛為西曹掾孟天偉賦

夢斷柯庭月滿林却從良冶嗣遺音沈埋難蝕千年節剛烈能鳴
七竅心同老飛來洞庭晚劉翁仙去武夷深太平不用為鋒刃吹
盡人間市酒金

題苦思丁成之去思碑

延祐乙卯余登第倅遼州苦公成之實監郡後十七年承
乏參議中書成之由吏部侍郎除守四明待罪政府成之
考最擢兩淮都轉運使庚辰夏五承召過維揚始見其四
明去思碑墨本益信昔之考最為不誣也俄陞浙東道宣
慰使都元帥開治四明邦人士之喜當何如耶余昔同僚

相得其驩故樂道其概而重之以詩曰

當時同列共精貞深幸掄材與鑑衡漕府五年書上考海天雙節
照連城春留舊治棠無恙雲護豐碑薛不生竹馬兒童應有語四
明山水故多情

送王仲方赴彰德總管

天門魚鱗換魚符華髮偏宜皂蓋車愧我老非鄉郡判喜君名入
御屏書莫憑鄰下一時語當念民心三代初涇水先瑩滿松栢春
風餘力望吹噓

題楊德璋崇德樓

樓頭天接玉門關樓下河流繞賀蘭要與聖賢同踐履不因風月
事游觀牙籤插架三萬軸畫棟飛雲十二闌歲晚德符何處是階
庭玉樹倚高寒

春波小隱圖

楊柳煙深鶯未老
桃花浪暖鯉初肥
人生何日脫羈鞅
方外有天容
布韋已辨筆床
隨野艇更添茅屋
傍漁磯莫言大隱
皆朝市猿鶴由來識是非

贈范堯臣赴棠陰巡檢

平生狹氣薄雲天
能使聲名一日傳
胸次故家兵十萬
世間新話字三千
明堂杞梓恰橫道
小隊弓刀試着鞭
好養排風舊毛質
九霄騫翥有他年

復科呈原功并序

自愧膚學忝與首科凡我同盟綴歐詹之虎榜問余何事
據荀勗之鳳池適丁國是之多艱莫救文風之不競紫衣
傳詔驚聖訓之如綸玉笋聯班愧天香之滿袖忍作捧書

之王旦誓為乞旅之申胥憾無一字以解圍愈重同年之
浩歎結廬在人境我方歸隱於柴桑臨流作釣磯公欲買
田於清潁奎纏有赫天道好還御燭星辰先賁玉堂之元
老宮壺雨露繼呼黃閣之陳人為北道之遠來雪東隅之
舊恥王庭孚號政府僉謀一髮引千鈞孰能勝此片言重
九鼎子之功夫障百川之狂瀾揭中天之華日因人成事
遂收效於桑榆曰我能興竟踐言於息壤喜而不寐詩以
永歌勗爾羣材好作儒林之晁董歸哉二老甘為聖世之
巢由略此寫心伏希捧腹

圖書東壁久蒙埃手障西風為掃開駝背不緣公第一魚美無愧
我重來栽培桃李非私已收拾梗楠要育材心事已酬歸便得石
田茅屋又蒼苔

糟笋和原功韻

穿林快劍截文犀沈浸誰教遽到齊王版悅禪成骨醉籜龍醜味
失雲棲此君一譜通儀狄稚子三生是阮迷我向楚山舖未厭等
閑那肯傳冰蘂

送盧正卿赴福建運同

桂林萬里恰歸來又遣三山二漕臺科第人材今可數東南民力
已堪哀牢盆久待攜春去行李先期載月回九曲棹歌無用和好
從雲谷問生財

時雨忽降簿書甚稀獨坐後堂王可矩右司以詩見教次其
韻二首

翠樾雲深百鳥鳴彤闈如水嫩涼生雨聲自與詩有約天巧豈容
人強名萬里秋風黃鶯夢五湖春水白鷗盟年來不用愁華髮尚

有觀山老眼明

西廳東閣總詩鳴天籟相關觸處生京國故人多老病洛陽才子
獨聲名風雲幸際文昌運松栢休忘歲晚盟他日江湖攜手去儘
渠蚊睫有焦明

方早得雨九齡平章徵詩志喜

才覺驕陽氣鏤金便令璇極轉濃陰坐朝真有作霖手伴食可攄
憂國心一夕夢占魚兆協九天雲接鳳池深神功帝力猶能賦獨
雅從教愧賀琛

送宋子與赴贛州照磨

賢勞鈐槩十年期才得春風賦式微黃牒已逾毛義檄綠袍無負
老萊衣蒲帆和月載詩去芸閣分香滿袖歸明日鬱孤臺上望白
雲應是不孤飛

送楊德璋降香甯夏如來寺

何年金像峙堂堂天眷方增慧日長一旦皇華遠銜命滿林簷
若為香子行又遂庭闈樂詩苦甯知道路長為向平章專問訊
雲椿樹思茫茫

延春門對雪丞相命即席賦

峇堯宮禁接同雲寒壓東華十丈塵輦轂幾年無此雪廟堂今日
有斯人瓊樓影亂三山月溫樹花驚一夕春可笑袁安不高卧要
將綿力助洪鈞

正月八日行香中心閣過王君實侍郎留酌

中心臺閣曉參差白髮遺民幸侍祠禮部尊開成一醉皇州春到
不多時空庭鶴舞能留客古鼎香銷未得詩酒盡且歸君莫訝上
元回首又休期

考官王師魯博士監試張雄飛御史皆同年也因成鄙句以
寫舊懷

仁皇下詔急求賢糠粃當時偶在前兩榜復科新大比三人聯事
舊同年關山道路尋常夢臺閣風雲尺五天但使得才今勝昔吾
儕甯復歎華顛

雄飛喜作詩而例禁不得相見作此調之

張子能詩擅士林無時無地輟搜尋文場咫尺不相見春興幾多
應自吟鍊字直教成白首知音豈待鑄黃金何時樽酒論真訣要
自康謠說到今

至公堂即事二首

科目中微復盛行至公堂上寓權衡鵠袍儼雅四百輩鵬翼扶搖
九萬程椽筆雲雷平地起蘆燈火徹宵明得賢要效涓埃報白

日青天鑒此誠

五更傳鑰棘門開
中卷于于悉俊才
萬世重儒有天在
八人承詔主文來
良金政待披沙揀
真玉休教抱璞回
早捧賢書拜天子
紅雲跬步是蓬萊

雄飛有詩次其韻二首

句句珊瑚問木難
君才不愧鄭都官
月中有桂天何近
春半無花曉尚寒
多士文章雲五色
野人心事日三竿
松廳雅興知多少
只恐毫端墨易乾

少年文戰不知難
老矣常憂負縣官
詩筆亂搖松月碎
席房清透柏霜寒
人間跋鱉從千里
海上連鰲待一竿
無奈春風笑吾輩
滿堂佳客酒杯乾

用東曹掾徐仲禮韻

簾幙香凝畫景遲
卿雲不動九天低
百年場屋重開設
一代人才入品題
賦類長卿慚狗監
車如伯厚笑雞棲
欲知應瑞文明處
夜夜寒芒爛壁奎

謝賀右丞寄葡萄酒

幾年西域蓄清醇
萬里鴟夷貢紫宸
仙露甘分紅玉液
天風香透白衣塵
相君不用涼州牧
老子方懷漢水春
自把匡羅還自酌
惜無細馬錦靴人

賀明初蒲萄酒韻

漢家西域一朝開
萬斛珠璣作酒材
真味不知辭麴蘖
歷年無敗冠尊壘
殊方尤物宜充賦
何處春江更發醅
却笑無功戀門下
秬田荒盡不歸來

至正集卷第二十終

至正集卷第二十一

律詩

哭甥縣寄秉彝并序

至正壬午十月二十七日知甥縣死尚不知其何地何時也縣生吾家先妣鍾愛其女幸其有子鞠育勞瘁過諸孫有疾醫禱聞無不為費給不貲不忍其歸挈之來揚州吾妹不幸卒先妣繼之秉彝來赴與余同舟至九江予沂鄂秉彝挈縣入洪時四歲頑健異常兒書來每稱其對客誦詩不聞其弱也予在上京使如洪因遣視縣歸言頑健勝昔歲己卯秉彝挈之過鄂年十二矣身雖修長而精神若不完者心竊疑而察其故乃知秉彝嘗與新夫人燕坐既筵之復使前跪至夜分不釋疾暴作仆於地數日始甦由

是頑健之態不復矣此洪醫之言也又聞諸婢無不得
之者飲食不時粗惡不堪號飢於諸僕僕有憐而竊飼之
者必遭中傷叔母者視之頗謹尋被謗讟三事余亦未敢
深信而鄂之目擊者多且以二小節言之姪女嫁王氏日
舉室送於其家獠僮寅孫挹釜中肉汁而飲縣亦挹之未
及口婢春蘭不罪寅孫獨連擊縣首而奪其碗此阿燕之
親見者也有熟客過秉彛縣先與客坐王婢杜姐之小雛
保兒突來坐縣上迫縣取茶縣意懶對客拳擊之而繼以
數拳且捽其耳不釋雖小兒素戲其色與氣俱非戲者此
蓋習見諸人之毆不以為怪也即欲理究姻事方喧老夫
亦被辱吻以故齧齒隱忍容今無恙不欲著其姓名恐遭
怒嫁禍於人秉彛偕王族之將歸也縣旦夕泣訴於阿燕

欲留武昌至言不留之便跳入江其言有條理不類駭者
又喋喋泣訴於亡妻當時處之甚難百計甘旨誘之使悅
始肯就舟今思其言痛不忍舉似也秉彛亦知之乎秉彛
為人慈仁寬厚在路人且不忍肯不恤其子乎先考妣待
秉彛之厚天實知之雖無奩貲君子之於人取其心不取
其物肯有不善視其甥以存世好乎區區所以有遺憾者
秉彛不明爾然父子之情豈不切於舅甥而况修短有命
非人之所能為知此而又饒饒者念先妣盡瘁之無功而
吾妹一脈之遂絕有不能自己者焉乃哭之以詩曰

妹已云亡又苦甥肺肝摧裂淚如傾死生固是天無爽器虐還因
父不明兩姓世緣從此絕吾家宅相待誰成湓江鄂渚回頭夢滿
耳猶聞泣別聲

盧溝橋

盧溝橋下水無聲半是黃沙半是冰老子還家欣又過少年題柱
愧何曾直教車馬通萬國不遣舟航泛一泓送客漸稀容少駐西
山寒翠晚峻層

途中即事二首

風袂茸茸動黑貂馬行空濶不知勞天邊紫闥人漸遠雪後青山
氣愈高一飯忘君臣豈敢十年伴食罪何逃鳴夷傾倒休惆悵野
店青帘有濁醪

倦翼翩翩下九霄投林有路敢辭遙邦畿天近春先覺澤國風輕
凍欲消牛背神光何咄咄馬頭歸興正迢迢行人不識庭筠白茅
店鷄聲近板橋

馬上日暮

郊原歲晚眼增明雲樹煙村隔幾層人影漸長天欲暮烏輪未墜
月先升冥冥遠意雲中鶴碌碌何功臂上鷹旅次不遙詩未穩儘
教羸馬漫騰騰

待泮

三分春過一分期底事堅頑尚未漸土塌且為安坐計冰山行有
自消時夢回南浦添華髮目斷東風動碧漪恰似杜陵悲去國終
南清渭更遲遲

以皺皮靴贈明初

皺皮精製出龍沙曾記遼人獻宋家素質寬柔裁稱足碎雲縈帶
感成花不須一量煩曹操却笑三生是革華願了亨衢服無數我
方芒屨事煙霞

龍虎臺迎接次焦德元韻三首

昔人曾厭薛居州却聽江南領畧秋
束帛印園勞使節五湖煙水
負漁舟病來元亮欲止酒老矣子
長猶好遊早拜君王乞身去休
教敝盡黑貂裘

晚風吹角入涼州塵夢驚回恰見秋
雲壑周圍皆可屋霜溪清淺
不勝舟為子深負元德秀款段空
懷馬少遊賴有三升門下酒不
須輕典鷓鴣裘

自信山林已半仙山林回首又茫然
關河跋涉幾千里雲水嘯歌
才二年輦路雲輶花接軫故山茅
屋竹為椽鳳凰池上恩波潤得
似滄江理釣舡

同敬伯高尚書行昌平舊邑

滿目郊原是舊遊賜還恩德若為酬
臺高龍虎擅多景地有螟蝗
尚半收紫氣浮關黃屋近錦雲縈
樹玉峯稠山英多事今猶昔應

笑重來兩鬢秋

友人解之昂物故已三年矣昌平縣
解壁間見其為御史行
部時詩感而次韻

漢江觴詠查難期底事飛仙不少遲
敗屋尚餘揮灑處扁舟空記
嘯歌時故家喬木有闕闕老境空
房無戾戾泉下有知應少慰故
人獨解辨哀辭

偕杜叔愚王仲武章君錫可行遊馬
廷彥獨樂臺山居廷彥
出素屏求詩為書二首時九月二日
甲子久雨初霽

郊原聯轡看西成况有幽人倒屣迎
一曲霜溪環老圃幾層雲岫
護佳城浮生少與良辰遇樂事今
逢甲子晴自笑匡時已無策欲
從吾子耦而耕

獨樂臺邊孝子家耕田力學了生涯
年豐不慮樽無酒秋老行看

菊有花甕峙墓垣逾鐵石山圍書屋滿煙霞我來不結雞豚社試
向清洹照鬢華

陳公儼有亭在鯨川東里米元章書扁曰蕭閑外舍惜傳刻
失真予既為書之且為詩曰

鯨川東里近煙村小巧翬飛棟宇新不見米顛題外舍幾如同老
笑西鄰柳邊花塢浮紅出桑下蔬畦潑翠勻世務驅人行有日扁
舟何處更尋春

劉仲敬知州出其父同知公所書退之陳旱詩聶夷中傷田
家詩求題其後

羨墻無地不思親况此淋漓手澤新兩紙文辭有深意一門父子
盡忠臣尋常考室真能構多少贏金反速貧大勝牙籤三萬軸轉
頭都作蠹餘塵

劉仲敬堊香亭

蒼葛林中不學禪作亭容膝俯鯨川琅琊多景正三月參戶有春
同一天風送交花清不斷煙和芳草遠相連醉翁樂處君應識更
看流芳幾百年

臘日雪次房純德教授韻四首

一宵川媚更山暉簫鼓聲中亂玉蕤天上風雲應三戍人間道路
隱多歧春方欲動成佳節重不能擎愧老枝臘酒醒來風味好鼎
香融水煮茶時

臘場風勁日凝暉凍捲雲旂與翠蕤上苑花開詩一札中天林耀
戟千歧芳叢蓄潤宜萱草亂翠先春綴柳枝還記口脂露賜罷馬
寒如蝟躑歸時

雲合璇穹冷不暉皚皚萬斛播芳蕤慕袁高卧甯祠皂訪戴空回

勝泣岐面藥霑恩辭北闕宮梅纔暖破南枝吏民飲散天無夜是我衝寒得句時

不用燈臨歎落暉白虛光裏看歲蕤勞農持酒光搖面紀瑞濡毫凍作歧三白積成千頃麥六花開徹萬年枝土牛且莫消寒盡留暝書窗夜坐時

寄明初

四載周旋似屢蛩如何遽作馬牛風年來涉世真啗蠟老去攜家猶轉蓬月滿醬臺應策杖花開洹水定從公投閑儘有娛心處最憶相知一笑同

房純德有詩贈別求和

冰泮黃流暖不清風帆吹去笑浮生病方止酒難為別老不忘詩似好名無惠及人宜避世有才憐子未登瀛鯨川漸遠洹溪近煙

柳斜陽總是情

次館陶寄韓伯高叅政

白頭心折軟紅塵歸去山田恰自耘千里幾回思命駕孤舟三過得陪君酒香梅屋春如海詩入槐莊暮有雲好署新銜判風月只教毛穎策奇勛

城居苦多客避之野棲來者亦復絡繹閏二月二十七日大風而雨始得獨坐終日久困諠囂偶遂幽寂有不可名言之樂因成五十六字

千嶂松檜一川槐槐底柴門晝不開風雨孤村無客至煙雲遠岫有詩來課童引水澆新樹力疾扶筇踏舊苔莫羨錢塘風物好洹溪春漲綠如醅

三月十九日偕明初出郭

天光明潤物華新
黃鳥間關隔岸聞
嫩綠園林初過雨
老青巖谷半封雲
閑人得計惟豐歲
老境論文有此君
一壺一印能事畢
山英無事更移文

相下酷暑不減江南明
初方思鄉以此調之

栽竹觀梅即故鄉
羹魚飯稻亦尋常
濕蒸暑物歷生醅
炎熱攻人痲作瘡
愴地翻疑在吳楚
馬君甯復念衡湘
苦無一種還思否
蚊蚋轟雷嘴似鉗

題蜀江圖

誰收全蜀入丹青
寫到夷陵至喜亭
巫峽有猿秋寂寂
陽臺無雨書冥冥
蠶叢開國不平水
賈客泛舟如建瓴
聖世無分南與北
朝宗回首達滄溟

白公嚴檢校自任城訪予相下首謁先公瑩感其高義作詩

謝之

扁舟千里淡相尋
不愧前人命駕心
歲晚江空豈乘興
調高絃在有知音
光增杞菊雙崖月
香動松楸十畝陰
村酒未釀詩未就
碧雲紅日半規沈

公嚴寓乾明僧舍夜坐誦洹阡新作次其韻

今日禪關為子開
絕勝凡客暫天台
佳人有約甯辭遠
清興無窮未許回
取醉憑誰釀滄海
忘形隨遇即蓬萊
葛藤拈起三生白
萬水千山得得來

雄飛同年自杞縣來訪樽酒論文時雪適降

林慮寒翠滴漳濱
歲晚從感故人天下
多才甯少我人間
有雪更無塵
錦囊滿貯瓊瑤句
玉笋濃浮琥珀春
湘雨燕雲論歲月
白頭休厭往來頻

夜坐與雄飛明初聯句就次韻

天風浩浩鴈聲乾
霜月娟娟鶴影寒
有士夢遠雲衢毛質在
詩成雪屋篆煙殘
翔十年黃閣雙蓬鬢
萬古青山一鵝冠
恩情話未闌

鷄促曉回頭
冰雪踏漫漫
有士

硯池凝玉凍
毫乾笑語生
春頓不寒
世路多歧
雙屐在書囊
無底一燈殘
故人相會須投轄
老境何求不挂冠
學得屠龍將底用
令人千古笑評漫

入春雨雪凡三浹日乃二月九日甲子開霽喜而賦此

春風彌月六花稠
誰遣東風一夕收
赤地免為千里旱
黃雲應見兩歧秋
陰晴何與山林事
豐歉猶懸口腹憂
明日西疇有餘力
傍花隨柳徧吾州

婢飼鴨逐鶴感而成詩

鶴長鳧短久難齊
底事身長反受飢
曼倩恃才方自售
侏儒求飽欲何為
九皋風露聞清唳
萬里雲霄有去時
滅獲凡庸那問此
只知鹽漬卵累累

有懷江夏別業

翠鷓山前鸚鵡洲
眼中風物夢中遊
手栽松菊成三徑
御賜詩書滿一樓
勝地方將專相土
老懷無奈憶并州
此身天幸成閑散
陸有輕車水有舟

赴召入京諸公餞飲洹水橋

柳拂輿梁雨漲波
謁阡行稼經幾過
又為擾擾馳名者
其奈遲遲去魯何
病後壺觴驚量減
老來兒女轉情多
慙慙寄謝漁樵友
未許塵埃暗綠蓑

京師送馮景仲赴江西儒學提舉

保釐江右重文衡
多少詩儒望典刑
六載成均時雨化
九科豪傑曉天星
懷人南浦多新句
訪古東湖有小亭
我亦從君鴻鵠舉
都門楊柳正青青

